

ル 5  
137  
2

輿地廣記二





東京書  
圖書

名  
137  
2

輿地廣記卷第十

河北東路

北輔開德府春秋時屬衛國秦置東郡二漢屬東魏二郡晉屬  
 濮陽國頓丘郡隋屬東武陽二郡唐屬澶濮魏三州晉天福中  
 移濮陽於澶州南郭為治所九年升鎮寧軍節度 皇朝大  
 觀元年升開德府崇寧四年建為北輔今縣七  
 中濮陽縣本漢頓丘縣地其濮陽故城在今縣東帝顓頊之墟  
 也謂之帝丘夏后相嘗居於此夏伯昆吾亦都之春秋時衛  
 成公自楚丘徙焉夢康叔曰相奪子享公命祀相秦始皇東  
 徙衛君角而置東郡二漢皆因之晉置濮陽國隋屬東郡唐  
 屬濮州晉天福中移縣於澶州南郭為治所有鮒鰓山帝顓  
 頊所葬有瓠子口漢元光中河決瓠子東南注鉅野  
 望觀城縣古觀國嘗叛命為夏所伐左傳所謂夏有觀扈是也

也十 河北東路



漢為畔觀縣屬東郡光武更名衛國以封周後晉屬頓丘郡  
隋開皇六年更名觀城屬武陽郡唐屬澶州有臨黃縣漢畔  
觀縣地也後魏置隋因之屬武陽郡唐始屬魏州大曆七年  
來屬 皇朝雍熙四年省入觀城有新臺衛宣公作  
緊臨河縣漢黎陽縣地屬魏郡隋開皇六年析黎陽置臨河縣  
十六年置澶淵縣並屬汲郡春秋諸侯之大夫會于澶淵此  
其地也後避唐高祖諱改澶淵為澶水武德四年於澶水置  
澶州正觀十年州廢省澶水入臨河屬魏州五代時來屬  
中清豐縣漢頓丘縣地唐大曆七年析頓丘昌樂置清豐縣以  
孝子張豐為名屬澶州頓丘本衛邑在淇水南故詩言送子  
涉淇至于頓丘二漢屬東郡晉置頓丘郡後郡廢焉隋屬武  
陽郡唐始屬魏州大曆七年於頓丘復置澶州晉天福四年  
移濮陽於澶州南郭為治所而以頓丘為德清軍 皇朝

熙寧四年省頓丘入清豐

中衛南縣本楚丘也衛文公自曹邑徙此始建城市而營宮室  
隋開皇十六年置楚丘縣屬東郡大業初以梁郡有楚丘乃  
改為衛南唐屬滑州五代時來屬  
畿朝城縣本二漢東武陽縣屬東郡臧洪為東郡太守據此以  
拒袁紹紹圍之城陷為紹所殺魏晉屬陽平郡北齊廢之後  
周復置武陽縣隋屬武陽郡唐屬魏州正觀十七年省永昌  
元年復置武聖縣開元七年更名朝城晉屬大名府  
皇朝崇寧四年來屬  
畿南樂縣漢東郡之樂昌也宣帝封王武為樂昌侯後漢省之  
晉置昌樂縣水經樂昌縣故城東而注引漢書表志以為東  
郡之屬縣漢宣帝封王稚君為侯國此則以樂昌為昌樂矣  
隋屬武陽郡開皇六年置繁水縣大業初廢昌樂縣入繁水

也 河北東路



唐置昌樂廢繁水入焉後唐避諱改為南樂晉屬大名府  
皇朝崇寧四年來屬

次府河閒府春秋時屬晉戰國時屬趙秦屬上谷郡漢屬涿郡  
後漢為河閒國晉因之後魏為河閒郡孝文帝置瀛州隋廢郡  
而州如故大業初州廢置河閒郡唐為瀛州 皇朝大觀二  
年升河閒府瀛海軍節度今縣二

望河閒縣本漢州鄉武垣縣地屬涿郡後漢省州鄉入武垣屬  
河閒國晉因之後分置河閒縣郡徙治此隋開皇初郡廢為  
瀛州大業初復置郡省武垣入焉唐為瀛州東城鎮本漢東  
州縣屬勃海郡後漢屬河閒國晉屬章武國北齊廢之隋開  
皇十六年置曰東城屬瀛州大業初屬河閒郡唐屬瀛州  
皇朝熙寧六年省入河閒

望樂壽縣本漢樂成縣為河閒國治焉後漢及晉皆因之隋開

皇十八年改為廣城屬瀛州仁壽初改為樂壽屬河閒郡唐  
屬瀛州後屬深州景城鎮本漢景成成平縣地屬勃海郡後  
漢省景成入成平屬河閒國晉因之隋開皇十八年改為景  
城屬瀛州大業初屬河閒郡唐屬瀛州 皇朝熙寧六年  
省入樂壽

上滄州春秋戰國時為齊趙二國之境秦屬鉅鹿上谷郡漢置  
渤海郡後漢晉因之宋文帝置樂陵郡孝武分置渤海郡後魏  
因之太武初改渤海為滄水孝文時復舊孝明帝分瀛冀二州  
置滄州及浮陽樂陵二郡隋置棣州後改為滄州尋為渤海郡  
唐為滄州天寶元年改為景城郡今縣五

望清池縣本漢浮陽縣在浮水之陽高帝置渤海郡治此後漢  
及晉皆屬焉隋開皇十八年改曰清池屬渤海郡唐屬滄州  
正觀元年州自胡蘇徙治於此長蘆鎮以水為名本漢參戶



縣地屬渤海郡後省焉隋開皇初置長蘆縣及漳河郡尋廢  
十六年置景州大業初州廢屬河間郡唐武德四年又置景  
州正觀元年州廢屬滄州周省入清池饒安鎮本漢千童縣  
屬渤海郡靈帝改曰饒安晉因之後置滄州及浮陽郡隋開  
皇初郡廢大業初州廢屬渤海郡唐屬滄州 皇朝熙寧  
五年省入清池乾符寨本二漢章武縣屬渤海郡晉屬章武  
郡後省焉隋開皇十六年置魯城縣屬瀛州大業初屬河間  
郡唐正觀元年屬滄州乾符元年生野稻水穀二千餘頃燕  
魏飢民就食之因改名曰乾符周省入清池有徒駭河禹貢  
九河之一也

望無棣縣本齊地昔周成王賜齊太公履北至于無棣是也漢  
為陽信縣地隋開皇六年置無棣縣屬渤海郡取縣南無棣  
溝為名唐屬滄州正觀元年省入陽信八年復置無棣溝通

海隋末廢唐永徽元年薛大鼎開之百姓歌曰新河得通舟  
楫利直達滄海魚鹽至昔日徒行今騁駟美哉薛公德滂被  
皇朝治平二年徙治保順軍有鬲津河禹貢九河之一也

緊鹽山縣二漢高城縣屬渤海郡故城在今縣南晉以後皆因  
之隋開皇十八年改為鹽山屬棣州大業初屬渤海郡唐屬  
滄州有鹽山

緊樂陵縣二漢屬平原郡故城在今縣東晉屬樂陵國後為樂  
陵郡治焉隋開皇初郡廢屬棣州大業初屬渤海郡唐屬滄  
州有漢重合縣故城在縣東 皇朝熙寧二年徙治咸平  
鎮有鈎盤河禹貢九河之一也

中南皮縣漢屬渤海郡章武有北皮亭故此云南皮後漢為渤  
海郡治焉建安中曹公破青州刺史袁譚於此晉因之隋屬  
渤海郡唐屬景州臨津鎮本漢東光縣地隋開皇十六年於



胡蘇亭置胡蘇縣屬平原郡唐更名臨津屬景州 皇朝

熙寧六年省入南皮有潔河禹貢九河之一也

上冀州春秋時屬晉戰國屬趙秦屬鉅鹿郡漢置信都國景帝  
改為廣川宣帝復故後漢明帝更名樂安安帝改曰安平後兼  
置冀州晉因之後魏為長樂郡兼置冀州北齊後周皆因之隋  
初郡廢而冀州如故大業初州廢復置信都郡唐為冀州

皇朝慶曆八年升武安軍節度今縣六

望信都縣漢為信都國治後漢為安平國治晉因之後魏以來  
為長樂郡治隋開皇初郡廢分信都置長樂縣大業初省信  
都入焉置信都郡唐為冀州改長樂縣為信都有禹貢泒水  
漢昌城縣屬信都國後漢改為阜城後徙焉故城在今縣北  
漢扶柳縣屬信都國後漢屬安平國晉因之北齊省焉故城  
在今縣西

上脩縣本漢脩縣屬信都國後漢屬渤海郡晉因之隋開皇五  
年改為脩縣屬冀州大業初屬信都郡唐屬德州永泰元年  
屬冀州漢觀津縣故城在東北

上南宮縣漢舊縣屬信都國呂后封張敖子偃為南宮侯即此  
後漢屬安平國晉省之後復置元魏屬長樂郡北齊省之隋  
開皇六年復置屬冀州大業初屬信都郡唐屬冀州堂陽鎮  
本漢堂陽縣屬鉅鹿郡後漢屬安平國晉省之後復置北齊  
省之隋開皇十六年復置屬冀州大業初屬信都郡唐屬冀  
州 皇朝皇祐四年省入南宮

上棗疆縣漢舊縣屬清河郡後漢省之後復置隋屬冀州大業  
初屬信都郡唐屬冀州漢廣川縣屬信都國後徙焉故城在  
今縣東北

上武邑縣漢屬信都國後漢屬安平國晉因之後齊廢隋開皇



六年復置屬冀州大業初屬信都郡唐屬冀州觀津鎮本趙地樂毅自燕降趙封之於此號為望諸君漢為觀津縣屬信都國後漢及晉因之後省有衡漳石隄唐顯慶元年築中衡水縣隋開皇十六年分信都北界武邑西界下博南界置衡水縣屬冀州大業初屬信都郡唐屬冀州

上博州春秋為齊之西境戰國屬齊趙衛三國之交秦屬東郡漢屬東郡平原清河三郡後漢屬東郡平原二郡晉屬平原國宋分置魏郡後魏置南冀州及平原郡隋初郡廢改州為博州大業初州廢屬武陽郡唐為博州天寶元年曰博平郡今縣四望聊城縣本齊西鄙之邑水經注云聊城縣東北三十里有攝城左傳所謂聊攝以東是也戰國時燕將保聊城齊田單攻之歲餘不下魯仲連乃為書約之矢以射城中燕將見書乃自殺二漢屬東郡魏晉屬平原國後為平原郡治焉隋開皇

初郡廢十六年置博州大業初州廢以聊城屬武陽郡唐武德四年置博州漢在平縣屬東郡後漢屬濟北郡魏晉屬平原國昔石勒耕於在平聞鼓角鞞鐸之聲其母以為作勞耳鳴即此後廢焉唐武德四年析聊城置在平縣正觀八年省入

望高唐縣春秋齊邑漢屬平原郡後漢及晉皆因之後魏置南清河郡北齊郡廢隋開皇初屬貝州大業初屬清河郡唐武德四年屬博州

望堂邑縣本漢清陽縣地為清河郡治焉隋開皇六年分置堂邑縣屬武陽郡唐武德四年屬博州

緊博平縣漢屬東郡魏晉屬平原國元魏屬長樂郡隋開皇初屬貝州大業初屬清河郡唐屬博州漢靈縣屬清河郡後漢及晉因之後廢隋開皇初復置大業初省入博平唐武德三



年復置四年省入焉

上棣州春秋戰國皆屬齊秦屬齊郡漢屬渤海平原千乘郡後漢屬北海平原郡樂安國晉屬樂安樂陵二國宋為樂陵郡後魏又為樂安樂陵二郡隋初屬棣州後屬渤海郡唐武德三年置棣州天寶元年曰樂安郡今縣三

望厭次縣本漢陽信縣地屬渤海郡後漢因之晉屬樂陵國後為渤海郡治元魏屬樂陵郡隋開皇六年置棣州大業初為渤海郡後郡徙治清地唐武德四年以陽信置棣州八年州廢屬滄州正觀十七年復置於厭次 皇朝大中祥符八年徙州城及厭次於陽信縣地

中滴河縣本漢枋縣屬平原郡後漢省之隋開皇十六年置滴河縣屬棣州大業初屬渤海郡唐屬棣州漢涇沃縣屬千乘郡後漢省之晉復置屬樂陵國北齊省之後入滴河

下陽信縣本漢富平縣後改為厭次屬平原郡後漢永平五年

復故晉為樂陵國治焉元魏屬樂陵郡北齊廢之隋開皇十

六年復置屬棣州大業初屬渤海郡唐武德四年屬棣州八

年州廢屬滄州正觀十七年復置屬棣州 皇朝大中祥

符八年徙州城及厭次縣於陽信而徙陽信於故厭次焉

上莫州漢為鄭縣屬涿郡後漢屬河間國晉因之隋屬河間郡

唐武德四年屬蒲州正觀元年屬瀛州景雲二年置鄭州開元

十三年以鄭鄭文相類更名莫州今縣一

上任丘縣本漢鄭縣地平帝時使中郎將任丘築城因以為名

後置任丘縣隋省之唐武德五年復屬蒲州景雲二年屬鄭

州開元十三年改鄭縣為莫 皇朝熙寧六年省莫縣入

焉長豐縣本利豐唐開元十年析文安任丘置屬鄭州是年

更名長豐

皇朝熙寧六年省

也

河北東路

七



中雄州春秋戰國皆屬燕秦屬六合郡唐屬涿易二郡晉時入於契丹周克復之置雄州 皇朝政和三年為易陽郡今縣

中歸信縣本漢易縣地屬涿郡後漢屬河間國公孫瓚有幽州童謠曰燕南垂趙北際中央不合大如礪唯此中可避世瓚自以為易地當之遂徙鎮焉易京故城在縣南十八里晉亦屬河間國北齊省入鄭縣隋屬河間郡唐武德五年置歸義縣屬幽州正觀元年省之八年復置景雲二年屬漢州是年還屬幽州大曆四年屬涿州晉時入於契丹周顯德六年世宗克瓦橋關置雄州治歸義縣 皇朝太平興國元年改為歸信有易水

中容城縣漢屬涿郡後漢省之晉復置屬范陽國隋開皇初改為道縣屬上谷郡唐武德五年置北義州正觀元年州廢以

縣屬易州聖曆二年契丹入寇固守不陷因改名全忠神龍二年復名道天寶元年改為容城周顯德六年屬雄州尋廢 皇朝建隆四年復置

中霸州漢屬渤海郡後漢屬廣陽國河間郡晉屬燕國章武後屬河間燕郡隋屬河間涿郡唐屬幽州莫州晉時入於契丹周克復之置霸州 皇朝政和三年為永清郡今縣二

上文安縣漢屬渤海郡後漢屬河間國晉屬章武國隋初屬瀛州大業初屬河間郡唐屬瀛州景雲二年屬莫州周顯德六年屬霸州 皇朝景祐元年省永清入焉永清本漢安次

縣地屬渤海郡唐如意元年析置武隆縣屬幽州景雲元年曰會昌天寶元年曰永清晉時入於契丹周世宗克益津關置霸州治永清縣後省入文安

上大城縣五代時置屬瀛州周顯德六年屬霸州

也十

河北東路

八



上德州春秋戰國皆屬齊秦屬齊郡漢置平原郡後漢因之晉  
為平原國宋屬平原郡後魏後周皆因之隋初置德州後復為  
平原郡唐為德州天寶元年曰平原郡今縣二  
望安德縣漢屬平原郡後漢及晉皆因之後為郡治焉隋開皇  
初郡廢九年置德州大業初復置平原郡唐為德州天寶末  
安祿山反河北皆陷獨顏真卿為平原太守帥眾討賊漢  
縣屬平原郡後漢及晉因之北齊省入故城在縣西北漢重  
平縣屬渤海郡後漢省之後魏復置北齊省之故城亦在縣  
西北德平鎮蓋漢平昌縣屬平原郡後漢省之晉為西平昌  
屬平原國後魏置東安郡北齊郡廢隋開皇初屬德州大業  
初屬平原郡唐屬德州後謂之德平疑後唐避諱更名  
皇朝熙寧六年省入安德  
緊平原縣齊之西邑韓信夜渡平原襲擊齊歷下軍即此漢高

帝六年置平原郡故城在今縣西南後漢及晉皆因之後郡  
徙治安德隋屬平原郡唐屬德州漢鄆縣屬清河郡後漢及  
晉因之北齊省入平原故城亦在縣西南  
上濱州自唐虞以下地理與涿州同初五代之際置榷鹽務於  
海傍後置贍國軍周世宗顯德三年置以其濱海為名割棣州  
之渤海蒲臺為屬縣而治渤海今領縣二  
望渤海縣唐垂拱四年析蒲臺厭次置屬棣州周顯德三年置  
濱州治此蒲臺鎮本漢鬲縣地屬平原郡臺高八丈方二百  
步昔秦始皇東遊海上於臺下繫蒲繫馬至今蒲生猶有紫  
繫之狀隋開皇十六年置蒲臺縣屬渤海郡唐屬淄州景龍  
元年屬棣州周屬濱州 皇朝大中祥符三年省入渤海  
緊招安縣 皇朝慶祿六年析渤海縣地置  
下恩州春秋時屬齊其後屬晉戰國屬趙秦屬鉅鹿郡漢置清

也十 河北東路



河郡後漢為清河國桓帝改曰甘陵魏復故晉因之後魏為清河郡北齊後周皆因之兼置貝州隋初郡廢後廢州而後復置郡唐為貝州天寶元年曰清河郡 皇朝慶曆八年改恩州

今縣三

望清河縣本漢厝縣屬清河郡後漢安帝以孝德皇后葬於厝改曰甘陵為清河國治焉桓帝時周福其縣人也晉改曰清河縣後曰武成縣置清河郡隋開皇初郡廢改武成縣為清河大業初復置清河郡唐屬貝州故清陽縣漢為清河郡治後漢省之徙治甘陵後復置曰清河縣北齊省貝丘入焉改為貝丘隋開皇六年復名清陽屬清河郡唐屬貝州

皇朝熙寧四年省入清河

望武城縣在趙時曰東武城平原君勝封於此邑漢屬清河郡後漢及晉皆因之隋為武城屬清河郡唐屬貝州

緊歷亭縣漢東陽縣地隋分武城郟置歷亭縣屬清河郡唐屬貝州漳南鎮本漢東陽縣屬清河郡後漢省之隋分棗強清平復置於古東陽城改為漳南縣屬清河郡唐屬貝州

皇朝至和元年省入歷亭

清州自唐虞以下地理與滄州同五代時置乾寧軍後入契丹周顯德六年世宗北伐取乾寧軍御龍舟樓船戰艦首尾數十里至益津關後廢焉 皇朝太平興國七年以滄州永安縣復置大觀二年河清七晝夜因改為清州政和三年為乾寧郡

今縣一

乾寧縣本永安縣之范橋鎮

皇朝太平興國七年置熙寧

六年省為鎮後復置縣崇寧三年又省之

同下州永靜軍自唐虞以下地理與滄德冀州同唐置景州周降為定遠軍屬滄州 皇朝太平興國六年以軍直隸京師



地十

十一

景德元年改為永靜今縣三

緊東光縣二漢屬渤海郡隋開皇初郡廢九年置觀州大業初

州廢屬平原郡唐屬滄州正元三年屬景州周顯德元年為

定遠軍治所弓高鎮本漢縣屬河間國後漢因之晉省焉隋

開皇十六年復置屬平原郡唐置景州治此周顯德二年州

廢省弓高入東光

望將陵縣漢重丘縣地隋開皇十六年於重丘故城置屬平原

郡唐屬德州後屬景州周顯德二年州廢還屬 皇朝慶

祿七年屬永靜軍安陵鎮本漢脩市縣地屬渤海郡晉置安

陵縣隋大業初省入東光唐武德四年復置屬觀州正觀十

七年州廢屬德州景福二年屬景州周復屬後省入將陵

中阜城縣漢屬渤海郡後漢屬安平國晉屬渤海郡隋屬信都

郡唐屬冀州 皇朝淳化元年屬永靜軍

同下州信安軍自唐虞以下地理與霸州同五代時地入契丹

周顯德六年世宗北伐取淤口關置寨屬霸州 皇朝太平

興國六年以淤口寨為破虜軍景德二年改為信安軍

同下州保定軍自唐虞以下地理與雄州同 皇朝太平興

國六年以涿州歸信縣新鎮置平戎軍景德元年改為保定軍

輿地廣記卷第十

也十

河北東路

七



輿地廣記卷第十一

河北西路上

次府真定府春秋時屬鮮虞為晉所滅戰國時屬趙秦屬鉅鹿郡漢高帝置恒山郡後避文帝名改曰常山亦屬真定國東漢屬常山國魏晉復為郡元魏因之後周兼立恒州隋開皇初郡廢大業初州廢復立常山郡唐武德初復曰恒州後升為成德軍節度元和十五年避穆宗諱曰鎮州五代時曰真定府梁以諱改曰武順後唐復曰成德晉曰順德漢復曰成德周及皇朝因之今縣九

次赤真定縣本中山國之東垣邑漢十一年代相陳豨反其將趙利守東垣高帝攻拔之改曰真定元鼎四年立真定國東漢併入常山魏晉為郡治在今縣南元魏道武帝移郡治於此今府城是也自唐寶應後叛將李寶臣王武俊王廷湊等



相繼據之有淳沱水

次畿橐城縣漢屬真定國北齊立鉅鹿郡後周因之隋開皇初郡廢十年立廉州大業初廢義寧元年復立鉅鹿郡唐武德元年改曰廉州正觀元年州廢來屬九門縣二漢屬常山郡魏晉元魏因之北齊省隋開皇六年復置 皇朝開寶六年省入

次畿欒城縣春秋晉大夫欒氏之邑漢為平棘縣地東漢置欒城縣北齊省隋開皇十六年復置屬欒州大業初州廢屬趙郡唐本屬趙州大曆三年來屬

次畿元氏縣本趙公子元之封邑漢高帝立恒山郡治此故城在焉東漢為國魏晉元魏屬趙國北齊省隋開皇六年復置唐屬趙州五代時來屬

次畿井陘縣漢屬恒山郡東漢魏晉元魏皆因之後省北齊廢

石邑以置井陘隋開皇六年復石邑分置井陘有陘山其道險隘李左車所謂車不得方軌騎不得成列是也有縣蔓水韓信攻趙背水為陣即此

次畿獲鹿縣漢石邑縣地隋開皇十六年分置鹿泉縣唐天寶十五年更名獲鹿石邑鎮本漢縣 皇朝開寶六年省有井陘口亦曰土門秦始皇興兵塞井陘口漢韓信出井陘破陳軍唐李光弼出土門破史思明軍皆在此地有葦山淳沱水

次畿平山縣本晉之蒲邑二漢為蒲吾縣屬常山郡魏晉皆因之後徙焉隋開皇十六年置房山縣唐天寶十五載改為平山

次畿行唐縣二漢曰南行唐屬常山郡魏晉以後皆因之隋曰行唐屬恒山郡唐屬鎮州五代時屬真定府有禹貢恒水



次畿靈壽縣漢屬常山郡魏晉以後皆因之後周立蒲吾郡隋開皇初郡廢唐屬鎮州五代時屬真定府 皇朝熙寧八年省元祐二年復置焉有禹貢衛水

望相州商王河亶甲居相此其地也春秋時屬晉戰國時屬魏後屬趙秦屬邯鄲郡二漢為魏郡曹公為魏王都此晉亦為魏郡後趙石季龍前燕慕容儁皆都之後魏置相州東魏北齊又都焉改為清都尹後周復置相州及魏郡隋初郡廢大業初州廢復置魏郡唐為相州天寶元年曰鄴郡故屬天雄軍節度梁分置昭德軍而天雄軍亂遂入於晉莊宗滅梁復屬天雄晉高祖置彰德軍今縣四

緊安陽縣漢為侯國曹魏時併入鄴徐廣晉紀曰石遵自孚城北入斬張豹於安陽後周移鄴縣及相州於安陽故城遂改為安陽縣魏郡治焉唐為相州有韓陵山高歡破尔朱兆於

此永和鎮本漢內黃縣地隋開皇十四年置長樂縣十八年改曰堯城屬魏郡唐屬相州天祐三年改曰永定 皇朝天聖七年改曰永和熙寧六年省入安陽

緊湯陰縣本二漢蕩陰縣屬河內郡晉屬魏郡後廢焉隋開皇六年復置屬汲郡唐屬相州正觀元年改為湯陰有羨里城商紂囚周文王之所

緊臨漳縣本漢鄴縣地東魏天平初析置臨漳縣屬魏郡後周及隋因之唐屬相州魏文侯七年始封此地以西門豹為鄴令民不敢欺至襄王時史起為鄴令引漳水溉鄴民賴其用漢高十二年置魏郡治此漢末袁紹為冀州牧鎮鄴曹公取之以為鄴都作三臺皆因城為基晉亂胡作石季龍慕容儁皆都之後魏置相州東魏北齊又都焉後周平齊復置相州隋文輔政總管尉遲迥舉兵不順韋孝寬討平之乃焚燒鄴



縣徙其居民南遷四十里以安陽城置鄴縣屬魏郡唐屬相州

皇朝熙寧六年省入臨漳

中林慮縣本漢隆慮縣屬河內郡後漢避殤帝名改曰林慮晉

屬汲郡後魏置林慮郡北齊廢之後復置隋開皇初又廢之

大業初屬魏郡唐屬相州

次府中山府堯始封於此春秋時為鮮虞戰國初為中山國後

為魏所并後又屬趙秦屬上谷鉅鹿二郡漢高帝置中山郡景

帝三年改為國後漢晉皆因之後燕慕容垂移都於此置中山

尹後魏為中山郡兼置安州大唐改為定州升義武軍節度

皇朝太平興國元年改定武軍政和三年改中山府中山郡今

縣七

緊安喜縣古中山國魏文侯使樂羊伐取之以封太子擊漢為

盧奴縣城內西北隅有水淵而不流色正黑或云黑水曰盧

不流曰奴故以取名後魏皇始二年滅慕容寶立安州道武

帝天興三年改曰定州北齊改為安喜後周置鮮虞郡隋開

皇初郡廢置鮮虞縣大業初廢安喜入焉屬博陵郡唐屬定

州武德四年改鮮虞曰安喜故陘邑縣本漢苦陘屬中山國

後漢章帝改曰漢昌魏改曰魏昌晉元魏因之北齊廢焉隋

開皇十六年復置曰隋昌屬博陵郡唐武德四年改曰唐昌

屬定州天寶元年改曰陘邑

皇朝康定元年省入安喜

緊無極縣二漢為毋極屬中山國晉省之後魏復置隋屬博陵

郡唐屬定州武后改毋極為無極景福二年置祁州周徙治

蒲陵

皇朝景德元年來屬

上曲陽縣漢為上曲陽屬常山郡後漢屬中山國晉屬常山郡

北齊去上字隋開皇六年改為石邑屬博陵郡七年改曰恒

陽唐屬定州元和十五年改為曲陽有北岳常山在西



中唐縣昔堯為唐侯國於此春秋時屬北燕昭十二年齊高偃  
納北燕伯款于唐是也漢屬中山國後漢及晉皆因之北齊  
廢焉隋開皇十六年復置屬博陵郡唐屬定州舊治中人城  
縣西四十里有中人亭左傳昭十三年晉荀吳侵鮮虞及中  
人大獲而歸是也聖曆元年徙治今所

中望都縣昔堯母慶都所居有堯山在北慶都山在南登堯山  
見慶都山故以望都名縣漢屬中山國後漢及晉皆因之北  
齊省入北平唐武德四年復置屬定州初治安險故城正觀  
八年徙治今所

中新樂縣古鮮虞國子姓漢為新市縣屬中山國後漢及晉皆  
因之後廢焉隋開皇十六年置曰新樂縣屬博陵郡唐屬定  
州

中下北平縣漢屬中山國後漢及晉皆因之後魏置北平郡北

齊郡廢隋屬博陵郡唐屬定州萬歲通天二年契丹攻之不  
下更名徇忠神龍元年復舊漢曲逆縣濡水於城北曲而西  
流故曰曲逆左傳哀四年齊國夏伐晉取曲逆是也漢高帝  
過之曰壯哉吾行天下唯洛陽與是耳詔封陳平為曲逆侯  
屬中山國後漢章帝醜其名改曰蒲陰晉因之北齊廢入北  
平

上邢州春秋時為邢國衛人滅之戰國時屬趙秦屬鉅鹿邯鄲  
郡常山王張耳都焉漢屬趙國廣平鉅鹿常山郡後漢因之晉  
屬鉅鹿趙國後趙石勒亦都焉後魏為鉅鹿郡隋置邢州後為  
襄國郡唐復為邢州天寶元年為鉅鹿郡梁升保義軍節度後  
唐改為安國軍今縣八

上龍岡縣故邢國秦時謂之信都項羽立張耳為常山王居此  
更名曰襄國漢屬趙國後漢因之晉省焉石勒陷冀州張賓



曰襄國因山憑險形勝之地可都也太和二年勒僭號於襄國其後為慕容儁所滅隋開皇九年改為龍岡縣襄國郡漢焉唐為邢州理夷儀鎮在縣北一百五十里春秋僖元年邢遷于夷儀即此

上沙河縣漢襄國縣地隋開皇十六年置沙河縣屬襄國郡唐武德元年置溫州四年州廢來屬有湯水

上鉅鹿縣本漢南絲縣屬鉅鹿郡後漢因之晉省焉隋於南絲故城置鉅鹿縣屬襄國郡唐武德四年屬趙州正觀元年來屬有禹貢大陸澤

上平鄉縣本鉅鹿縣秦始皇二十五年滅趙以為鉅鹿郡秦將王離圍趙王歇於此漢因之後漢及晉徙治慶陶而鉅鹿屬焉北齊縣廢隋置平鄉縣屬襄國郡唐屬邢州 皇朝熙寧六年省入鉅鹿元祐元年復置

上內丘縣本中丘縣漢屬常山郡後漢屬趙國晉因之元魏屬南趙郡隋曰內丘屬襄國郡唐武德四年屬趙州五年來屬有干言山詩所謂出宿于干飲餞于言是也

中堯山縣本柏人春秋晉邑也漢屬趙國高帝過趙欲宿心動問縣名何曰柏人上曰柏人者迫於人也去弗宿趙相貫高等果有逆謀後漢及晉皆屬趙國元魏屬南趙郡隋屬襄國郡唐屬邢州天寶元年改為堯山 皇朝熙寧六年省入內丘元祐元年復置

中南和縣漢屬廣平國後漢屬鉅鹿郡晉省之後復置後周置南和郡隋開皇初郡廢屬襄國郡唐屬邢州

中任縣春秋晉邑也鄭皇頡奔晉為任大夫漢屬廣平國後漢屬鉅鹿郡晉省之隋開皇十六年復置屬襄國郡大業初省入南和唐武德四年復置屬邢州 皇朝熙寧五年省入

也十一 河北西路上



南和元祐元年復置

雄懷州禹貢覃懷之地太行山在焉春秋時周襄王以陽樊溫原攢茅之國賜晉文公晉於是始啟南陽又云武王克商蘇忿生以為溫司寇其田有隕懷是也戰國時屬魏兼屬衛秦滅衛徙其君角於野王後二世廢角為庶人以其地屬三川郡項羽立司馬邛為躬王都此漢初為躬國尋更名河內郡後漢因之晉分屬汲郡後魏置懷州兼置河內郡隋初郡廢而懷州如故煬帝初州廢復置河內郡唐為懷州天寶初曰河內郡今縣三緊河內縣本野王秦始皇徙衛君角於此阻其山而保之漢屬河內郡後漢因之晉為郡治後魏兼置懷州隋開皇十六年改野王為河內唐為懷州西北三十里有邗城故邗國也周武王子所封太行山在西北武德鎮本秦縣始皇東巡自以武德定天下因以名縣焉二漢屬河內郡晉為郡治後置武

德郡隋開皇初郡廢十八年改州縣為邗丘大業初又改曰安昌屬河內郡唐武德二年復名武德屬懷州 皇朝熙

寧六年省入河內漢射犬縣故城在北平皋縣故城在西

中武陟縣本漢懷縣地隋開皇十六年析置武陟大業初省焉

唐武德二年置陟州及修武縣四年州廢改修武為武陟屬

懷州故懷縣本禹貢覃懷之地後為晉邑春秋時赤狄伐晉

圍懷是也二漢為河內郡晉屬河內隋大業初廢之後復置

唐正觀元年省入武陟故城在今縣之西

上修武縣本商之寧邑周武王伐紂勒兵於寧更名修武晉始

啟南陽即此故有南陽城二漢屬河內郡晉屬汲郡隋屬河

內郡唐武德四年改修武為武陟而別置修武縣於隋修武

故城屬懷州漢山陽縣屬河內郡後漢晉皆因之魏阮籍嵇

康等同居山陽時人號竹林七賢後縣廢故城在今縣西北



有雍城故雍國周文王子所封左傳僖二十四年富辰曰郟

雍曹滕文之昭也有濁鹿城漢獻帝為山陽公居此

望衛州春秋時分屬於晉衛戰國時屬魏秦屬三川郡二漢屬

河內郡魏置朝歌郡晉改為汲郡後魏因之東魏置義州後周

改為衛州又置修武郡隋初郡廢煬帝初州廢復置汲郡唐為

衛州天寶元年曰汲郡今縣四

中汲縣故商都牧野之邑水經注云太公生於汲城北三十里

有太公泉泉上有太公廟相傳云太公之故居也二漢屬河

內郡魏屬朝歌郡晉為汲郡治焉太康初縣人有發魏安釐

王冢大得古書皆簡編科斗文字所謂汲冢書也北齊置五

城郡後周廢為五城縣隋開皇六年復改為汲屬汲郡唐屬

衛州

上獲嘉縣本漢汲縣地武帝時南越相呂嘉反發兵討之元鼎

六年行幸至汲新中鄉得呂嘉首因以為獲嘉縣屬河內郡

後漢因之晉屬汲郡後周置修武郡隋開皇初郡廢十六年

置般州大業初州廢屬河內郡唐屬衛州

緊新鄉縣隋開皇初析汲獲嘉二縣於古新樂城置屬河內郡

唐屬衛州 皇朝熙寧六年省入汲元祐三年復置東北

有故臨清關東南有故延津關 中共城縣故共國左傳隱元年鄭太叔出奔共是也二漢屬河

六年復置曰共城屬河內郡唐屬衛州

望洛州春秋時為赤狄所有後屬晉戰國時屬趙秦屬邯鄲郡

漢置廣平國後漢國廢為鉅鹿郡之西部魏置廣平郡晉及後

魏皆因之後周置洛州隋大業初置武安縣後為洛州天寶元

年曰廣平郡今縣五



上永年縣本曲梁左傳宣十五年晉荀林父敗赤狄于曲梁是也漢屬廣平國後漢屬魏郡魏晉屬廣平郡北齊省曲梁入廣平縣廣平漢為國治自魏至隋皆為郡隋仁壽元年避太子名改廣平曰永年為武安郡治唐為洺州漢廣平縣故城在今縣北臨洺鎮本漢易陽縣屬趙國後漢因之晉屬廣平郡東魏屬魏郡隋開皇六年改易陽曰邯鄲十年改邯鄲為臨洺屬武安郡唐屬洺州 皇朝熙寧六年省入永年望肥鄉縣漢為邯溝縣地屬魏郡曹魏置肥鄉縣屬廣平郡晉因之東魏省焉隋開皇十六年復置屬武安郡唐屬洺州漢列人縣屬廣平國後漢屬鉅鹿郡晉屬廣平郡故城在今縣東北

緊平恩縣本漢館陶之別鄉元帝分置平恩以封后父許伯為侯國屬魏郡後漢因之晉及元魏屬廣平郡隋屬武安郡唐

屬洺州

中雞澤縣春秋襄三年公會諸侯同盟于雞澤漢為曲梁縣地隋開皇初置雞澤縣屬洺州大業初省入永年唐武德四年復置杜預注左傳云雞澤在曲梁西南曲梁今永年也此縣在永年東北疑非古雞澤地矣

上曲周縣漢武帝建元四年置屬廣平國東漢屬鉅鹿郡晉省之唐武德四年復置屬洺州 皇朝熙寧三年省入雞澤

元祐四年復置洺水鎮本漢斥漳縣屬廣平國後漢屬鉅鹿郡魏晉屬廣平郡北齊省入平恩隋復置改曰洺水屬武安郡唐屬洺州會昌三年省入曲周

望深州春秋時屬晉戰國時屬魏秦屬鉅鹿郡漢屬信都國後漢屬安平國魏晉為博陵國後魏北齊後周為博陵郡隋開皇初郡廢十六年置深州大業初廢屬博陵郡唐武德四年置深

也十一 河北西路 上



州正觀十七年州廢先天二年復置天寶元年曰饒陽郡今縣

五望靜安縣本下博漢屬信都國後漢屬安平國光武避王郎自

饒陽南出至下博城西惶惑不知所之有白衣老父在道旁

指曰努力信都為長安守去此八十里光武即馳赴之晉亦

屬安平國隋屬信都唐初屬冀州後來屬後周為州治焉

皇朝太平興國八年置靜安軍雍熙二年軍廢還屬三年縣

省四年復置改為靜安故陸澤縣本郡漢屬鉅鹿郡後漢作

鄆晉屬趙國唐先天二年析饒陽鹿城於故鄆城置陸澤縣

為深州治所後周徙治靜安皇朝雍熙四年省入焉有

禹貢大陸澤

望東鹿縣本漢鄆縣地屬鉅鹿郡北齊改郡曰安國隋開皇六

年改曰安定十八年改曰鹿城屬信都郡唐屬深州天寶十

五載改曰東鹿五代時屬真定國皇朝淳化元年來屬

漢貨縣故城在西南

望安平縣漢屬涿郡後漢屬安平國魏晉為博陵國治焉北齊

置博陵郡隋開皇初郡廢十六年置深州大業初州廢屬博

陵郡唐武德四年屬深州正觀十七年還故屬先天二年來

屬

望饒陽縣漢屬涿郡後漢屬安平國魏晉屬博陵國後魏屬博

陵郡隋開皇中分置安平蕪蕪二縣大業初省入焉屬河間

郡唐武德四年置深州治此正觀十七年州廢屬瀛州先天

二年置州復來屬而州徙治陸澤焉東北有無蕪亭漢光武

避王郎於此

望武彊縣本武隧秦破趙將扈輒於武隧即此漢屬河間國後

漢屬安平國晉因之後分置武彊縣元魏屬武邑郡隋開皇



初郡廢省武遂入焉屬信都郡唐初屬冀州正觀元年屬深  
州十七年屬冀州先天二年復來屬開元二年屬冀州永泰  
元年又來屬唐末屬冀州五代時又來屬

輿地廣記卷第十一

輿地廣記卷第十二

河北西路下

宋刻原闕



屬趙州唐初屬定州大曆三年屬恒州 皇朝端拱元年

來屬

中深澤縣漢曰南深澤屬涿郡後漢屬安平國晉屬博陵國元魏屬博陵郡北齊廢之隋開皇六年復置曰深澤屬博陵郡唐屬定州景祐二年屬祁州 皇朝熙寧六年省入鼓城元祐元年復置

望趙州春秋時屬晉戰國屬趙秦屬邯鄲郡漢屬恒山鉅鹿郡後漢因之兼置冀州晉為趙國後魏為趙郡明帝兼置殷州北齊改為趙州隋改為欒州後復為趙郡唐為趙州天寶元年曰趙郡 皇朝崇寧四年升慶源軍節度今縣五

望平棘縣二漢屬常山郡晉屬趙國後魏為趙郡治焉隋開皇初郡廢大業初復置唐屬趙州宋子縣昔秦高漸離匿作於宋子擊筑而歌即此地漢屬鉅鹿郡後漢省之元魏復置屬



鉅鹿郡隋大業初省入平棘故城在今縣北

望寧晉縣本慶陶縣地漢屬鉅鹿郡後漢晉元魏為郡治焉隋屬趙郡唐屬趙州天寶元年改為寧晉

上臨城縣本晉邑左傳哀四年趙穆奔臨是也二漢為房子縣屬常山郡晉為趙國治焉元魏屬趙郡北齊省之隋開皇六年復置屬趙郡唐屬趙州天寶元年改為臨城有泚水韓信斬成安君於此

中隆平縣本廣阿漢屬鉅鹿郡後漢省之元魏復置屬趙郡兼置般州後改為趙州隋開皇十六年置欒州仁壽元年改廣阿為象城大業初州廢改縣為大陸屬趙郡唐屬趙州武德四年復改為象城天寶元年改為昭慶以有建初啟運二陵故也 皇朝開寶五年改為隆平熙寧六年省入臨城元祐元年復置

中高邑縣本曰鄆晉邑也左傳哀四年齊國夏伐晉取鄆即此

漢屬常山郡後漢光武即位於此更名高邑為冀州刺史治焉晉屬趙國元魏及隋屬趙郡唐屬趙州柏鄉鎮漢縣屬鉅鹿郡後漢省之隋開皇十六年復置屬趙郡唐屬趙州

皇朝熙寧五年省入高邑贊皇鎮隋開皇十六年置取贊皇山為名屬趙郡唐屬趙州 皇朝熙寧五年省入高邑

下保州五代以上地理與莫州同 皇朝置保塞軍後升為保州政和三年為清苑郡縣一

望保塞縣本漢涿郡之樊輿中山之北新城地後廢置不常北齊省入永寧縣改為樂鄉隋開皇十八年改為清苑屬河間

郡唐屬瀛州景雲二年屬莫州 皇朝建隆元年以縣地置保塞軍太平興國六年升為保州改清苑為保塞縣

同下州安肅軍自五代以上地理與易州同 皇朝置靜戎



軍後改爲安肅軍今縣一

中安肅縣本易州遂城縣地

皇朝太平興國六年以遂城

之宥戎改置靜戎軍及靜戎縣景德元年改軍與縣皆爲安肅焉

同下州永寧軍自五代以上地理與中山府同

皇朝置寧

邊軍後改爲永寧軍今縣一

望博野縣本蠡吾漢屬涿郡後漢屬中山國桓帝父蠡吾侯葬

此追尊爲孝崇皇其陵曰博陵因分置博陵縣晉改曰博陵

爲高陽國治後魏改爲博野北齊省蠡吾入焉隋屬河間郡

唐武德四年置蠡州正觀元年州廢屬瀛州永泰中屬深州

周屬定州 皇朝熙寧四年以博野縣地置寧邊軍景德

元年改永定天聖四年改永寧

同下州廣信軍自五代以上地理與易州同 皇朝置威虜

軍後改爲廣信軍今縣一

中遂城縣本北新城漢屬中山國後漢屬涿郡晉屬高陽國後

曰武遂北齊改曰新昌隋開皇十八年改曰遂城屬上谷郡

唐屬易州 皇朝太平興國六年置威虜軍景德元年改

曰廣信

中下州順安軍自唐以上地理與瀛州同如意元年析河間縣

置武興屬瀛州神龍元年更名唐興與景雲二年屬莫州五代時

屬瀛州後廢焉 皇朝太平興國七年以廢唐興縣地置唐

興寨淳化三年升爲順安軍今縣一

中高陽縣漢屬涿郡後漢屬河間國晉屬高陽國後置高陽郡

隋開皇初郡廢十六年置蒲州大業初州廢屬河間郡唐武

德四年置蒲州正觀元年州廢屬瀛州 皇朝至道三年

屬順安軍



安東上都護府春秋戰國屬燕秦立遼東二漢因之漢末為公孫度所據魏晉亦為遼東郡後慕容廆居之後魏時高麗國都其地唐總章元年李勣平高麗得城百七十六分其地為都督府九州四十二縣一百置安東都護府於平壤城以統之用其酋渠為都督刺史縣令上元三年徙遼郡故城儀鳳二年又徙新城聖曆元年更名安東都督府神龍元年復故名開元二年徙於平州天寶二年又徙於遼西故郡城至德後廢領羈縻州十四

新城州都督府

遼城州都督府

哥勿州都督府

建安州都督府

南蘇州

木底州

蓋牟州

代那州

倉巖州

磨米州

積利州

黎山州

延津州

安市州

大都督幽州武王封召公奭於燕都此及秦滅燕以為上谷郡漢高帝分立燕國昭帝元鳳元年為廣陽郡宣帝太始元年更為國東漢建武中併入上谷郡永平八年復立為郡兼立幽州魏晉為燕國前燕慕容儁初都其地元魏立幽州及燕郡北齊置東北道行臺後周平齊置總管府隋開皇初郡廢大業初府廢立涿郡唐武德元年為幽州天寶元年曰范陽郡升為盧龍軍領縣九  
望薊縣周武王克商封帝堯之後於薊又封召公於北燕其後燕國都薊與六國俱稱王為秦所滅屬上谷郡二世時韓廣自立為燕王項氏封臧荼漢高帝封盧綰相繼為王皆都其地後改為廣陽國東漢為郡兼立幽州魏晉為燕國前燕慕容儁自和龍徙都於此後又徙鄴元魏亦為幽州及燕郡隋



煬帝立涿郡唐爲幽州

望幽都縣本薊縣地隋於營州之境汝羅故城置遼西郡以處栗末靺鞨降人武德元年曰燕州領遼西盧河懷遠三縣是年省盧河六年自營州遷於幽州城中以首領世襲刺史正觀元年省懷遠開元二十五年徙治幽州北桃谷山天寶元年曰歸德郡建中二年爲朱滔所滅因廢爲縣與薊分治郭下在府北一里

上廣平縣天寶元年析薊置三載省至德後復置

上潞縣二漢屬漁陽郡晉屬燕國元魏屬漁陽後爲郡治隋開

皇初郡廢屬涿郡唐武德二年自無終徙漁陽郡於此置玄

州正觀元年州廢來屬

上武清縣本雍奴二漢屬漁陽郡晉屬燕國隋屬涿郡唐屬幽

州天寶元年更名

緊永清縣本武隆唐如意元年析安次置景雲元年曰會昌天寶元年更名

上安次縣漢屬渤海郡東漢屬廣陽郡晉屬燕國元魏屬燕郡

隋屬涿郡唐屬幽州

望良鄉縣漢屬涿郡晉屬范陽國元魏屬燕郡隋屬涿郡唐屬

幽州聖曆元年改曰固節神龍元年復故名有大防山

望昌平縣漢屬上谷郡東漢屬廣陽郡晉屬燕國元魏省後置

東燕州及平昌郡後周州郡皆廢後又置平昌郡隋開皇初

郡廢屬涿郡唐因之北十五里有軍都陁西北三十五里有

納款關即居庸故關亦謂之軍都關其北有防禦軍古夏陽

川也有狼山

上涿州歷代地理與幽州同漢高帝立涿郡東漢因之魏文帝更名范陽郡晉武帝改爲范陽國以封宣帝弟子綏爲王元魏



北齊後周復為郡隋開皇初郡廢屬涿郡唐大曆四年節度使朱希彩表分幽州置後曰涿郡領縣四

上范陽縣本涿縣漢屬涿郡魏范陽郡晉曰范陽國元魏以後復為郡隋開皇初廢屬涿郡唐武德七年改涿縣曰范陽屬

幽州後分置涿州

上固安縣本漢方城縣地屬廣陽國東漢屬涿郡晉屬范陽國元魏屬范陽郡口口唐正觀元年自章信城移固安縣治此屬幽州後來屬

上新昌縣漢屬涿郡東漢省之唐大曆四年析固安復置

上新城縣本漢涿縣地唐大和六年析范陽置有督亢陂溉田號為膏腴燕太子丹使荆軻以督亢地圖獻秦王即此

上易州歷代地理與幽州同秦屬上谷郡二漢屬涿郡魏屬范陽郡晉屬范陽國元魏復屬范陽郡隋開皇初立易州及黎郡

尋廢大業初州廢立上谷郡唐為易州天寶元年曰上谷郡領縣四

上易縣本漢故安縣屬涿郡魏晉元魏屬范陽郡北齊省故安縣隋立易州及易縣又立上谷郡唐因之漢故安縣故城在

今縣南易水所出燕太子丹送荆軻入秦祖道於水上軻起為壽歌曰風蕭蕭兮易水寒壯士一去兮不復還即此

上涑水縣本二漢涑縣屬涿郡晉屬范陽國元魏屬范陽郡後周省之隋開皇元年置范陽縣屬易州六年改曰固安八年

省十年置永陽縣十八年改為涑水唐因之

中滿城縣漢北平縣地屬中山國元魏置永樂縣為樂浪郡僑治北齊屬黎郡隋開皇三年郡廢屬易州唐天寶元年更名

滿城有郎山中下五回縣唐開元二十三年析易縣置并置樓亭板城二縣



天寶後二縣省

下檀州歷代地理與幽州同秦為漁陽右北平二郡地二漢因之元魏立密雲廣陽安樂三郡兼立安州北齊廢密雲廣陽二郡入安樂後周改州為玄州隋開皇初郡廢十六年州徙尋立檀州大業初州廢復為安樂郡唐武德元年復為檀州天寶元年曰密雲郡領縣二

中密雲縣本二漢庠奚縣地屬漁陽郡後省元魏立密雲郡及密雲縣北齊郡廢屬安樂郡省白檀要陽二縣入焉隋屬檀州後屬安樂郡唐自燕樂徙檀州治焉元魏又立安樂郡領安市土垠二縣北齊省土垠入安市後周省安市入密雲隋開皇初郡廢故白檀要陽二縣漢屬漁陽郡東漢省之元魏復置分屬故土垠縣二漢及晉屬右北平郡元魏屬漁陽郡後分屬

中燕樂縣元魏置屬廣陽郡兼立安州北齊郡廢屬安樂郡省廣興方城二縣入焉後周改州曰玄州隋徙玄州尋立檀州後為安樂郡唐屬檀州

下薊州歷代地理與幽州同秦為漁陽右北平二郡地漢因之後廢隋文帝徙玄州於此并立總管府煬帝初置漁陽郡唐武德元帝郡廢入幽州開元十八年分立薊州天寶元年曰漁陽郡領縣三

中漁陽縣漢舊縣屬漁陽郡晉省之復置元魏屬漁陽郡後又省隋末復置唐屬幽州開元十八年析置薊州有鮑巨水

中三河縣唐開元四年析潞州置

中玉田縣本無終春秋無終子國也二漢及晉屬右北平郡元魏屬漁陽郡後省北齊復置隋為漁陽郡治後省唐武德二年復置屬幽州正觀元年省乾封二年復置萬歲通天元年



更名神龍元年屬營州開元四年還屬幽州八年屬營州十  
一年又屬幽州十八年來屬搜神記曰雍伯雒陽人性至孝  
父母沒葬之於無終山山高八十里而上無水雍伯置飲焉  
有人就飲與石一斗令種之口口口於種石處名曰玉田後  
因以名縣故徐無縣二漢及晉屬右北平郡元魏屬漁陽郡  
後周廢入無終

上媯州歷代地理與幽州同秦立上谷郡二漢因之晉太康中  
分立廣寧郡元魏曰廣寧郡北齊立北燕州及長寧永豐二郡  
後周去北字隋開皇初郡廢大業初州廢入涿郡唐武德七年  
平高開道立北燕州正觀八年更名天寶元年曰媯川郡領縣

一  
上懷戎縣本二漢潘縣屬上谷郡晉屬廣寧郡北齊改置懷戎  
縣及立北燕州後周曰燕州唐為北燕州後改曰媯州天寶

中析置媯川縣尋省媯水貫中故涿鹿縣二漢屬上谷郡晉  
屬廣寧郡後省昔黃帝與蚩尤戰於涿鹿即此涿鹿城東一  
里有阪泉黃帝與炎帝戰於阪泉即此東北五十里有居庸  
塞東連盧龍碣石西屬大行常山實天下之險有鐵門關有  
磨笄山趙襄子滅代其姊磨笄自殺因為名代人憐之為立  
祠

下平州商時為孤竹國春秋時山戎肥子二國地戰國屬燕秦  
為遼西右北平二郡地二漢因之晉屬遼西郡元魏屬遼西北  
平二郡兼立平州北齊廢遼西入北平隋開皇初郡廢大業初  
州廢復為北平郡唐武德二年曰平州天寶元年曰北平郡領  
縣三

中盧龍縣本肥如春秋晉滅肥肥子奔燕受封於此故曰肥如  
二漢及晉屬遼西郡元魏為郡治兼立平州北齊屬北平郡



隋開皇六年省肥如入新昌十八年改新昌曰盧龍爲郡治  
焉唐爲平州故令支縣二漢屬遼西郡晉省之有孤竹故城  
伯夷叔齊讓國於此漢靈帝時遼西太守廉翻夢人謂己曰  
余孤竹君之子伯夷之弟也遼海漂吾棺槨聞君仁善願見  
藏覆明日視之水上有浮棺吏笑者無疾而死於是改葬之  
爲立祠焉有盧龍塞道自無終縣東出渡濡水向林蘭陁東  
越清陁至凡城二百許里自凡城東北出趨平岡故城可百  
八十里向黃龍則五百里故魏志言田疇引軍出盧龍塞逕  
白檀歷平岡登白狼望柳城是也有濡河

中石城縣本臨渝二漢屬遼西郡晉省入陽樂隋末復置唐武  
德七年省正觀十五年復置萬歲通天二年更名故縣屬漢  
屬遼西郡故驪成縣漢屬右北平郡東漢皆省焉有禹貢碣  
石山秦皇漢武皆登之以望巨海其石碣然而立在海旁故

名之晉太康地志云秦築長城所起自碣石在今高麗界非  
此碣石也有臨渝關

中馬城縣本海陽縣地二漢及晉皆屬遼西郡唐開元二十八  
年置馬城縣以通水運

上都督府營州商時孤竹國地春秋時屬山戎戰國屬燕秦屬  
遼西郡二漢及晉皆因之前燕慕容皝自徒河之青山徙都於  
此後燕慕容寶北燕馮跋亦都焉元魏亡營州領昌黎建德遼  
東樂浪冀陽營丘六郡北齊廢昌黎遼東樂浪營丘併入建德  
冀陽二郡後周平齊其地爲高寶寧所據隋開皇初克之大業  
初州廢立遼西郡唐武德元年曰營州萬歲通天元年爲契丹  
所陷聖曆二年僑治漁陽開元五年又還治柳城天寶元年曰  
柳城郡領縣一

中柳城縣漢屬遼西郡爲西部都尉治東漢省慕容皝以柳城



之北龍山之南爲福德地也乃營建都邑改柳城曰龍城而徙居於此時有黑龍白龍各一鬪於龍山孰親觀之祭以太牢二龍交首嬉翔解角而去孰悅號新宮曰和龍宮後慕容寶馮跋相繼都焉元魏立營州及昌黎郡北齊廢郡隋開皇初改龍城縣曰龍山十八年復改曰柳城後立遼西郡唐曰營州漢交黎縣屬遼西故城在東南徒河縣屬遼西故城在東北青山慕容廆所據在東百九十里棘城高陽氏之墟在東南百七十里鮮卑山在東南二百里有鷄鳴山白狼水

輿地廣記卷第十二

輿地廣記卷第十三

陝西永興軍路上

次府京兆府本周室所居謂之宗周平王東遷地入於秦至孝公徙都焉始皇置內史漢元年屬塞國二年爲渭南郡高帝都此九年復爲內史武帝建元六年分爲右內史太初元年更爲京兆尹王莽旣敗更始赤眉相繼據之後漢都洛陽仍以此爲京兆尹獻帝亦嘗都此魏改尹爲太守後改爲秦國復爲京兆國晉爲京兆郡兼置雍州愨帝亦都之其後爲劉曜苻堅姚興所據後魏亦爲京兆郡兼置雍州後周復爲京兆尹隋初置雍州後改爲京兆郡唐初爲雍州開元元年改爲京兆府後周隋唐皆爲帝都昭宗遷洛廢爲佑國軍梁初改京兆府曰大安佑國軍曰永平軍後唐復爲西京晉廢爲晉昌軍漢改曰永興軍今縣十五



次赤長安縣本宗周之地文王作豐今縣西北靈臺鄉豐水上是也武王作鎬今昆明池北鎬陂是也秦為咸陽縣地漢高帝五年置長安縣惠帝元年城之經緯各長十五里城中皆屬長安今長安故城是也後漢因之晉及後魏為京兆郡後周都焉隋開皇三年自漢長安故城東南移二十里置新都前直子午谷後枕龍首山左臨灊岸右抵灃水唐因之有終南山灃水鎬水

次赤萬年縣本漢長安縣地後周始於長安城中置萬年縣取漢縣為名隋文帝龍潛封號大興開皇三年改曰大興縣唐武德元年復故名漢杜陵縣故杜伯國周成王滅唐而遷之於此宣王以無罪殺杜伯杜伯之神射王於鎬故有周右軍將杜主祠秦武公十一年縣之漢宣帝以杜東原上為初陵故更名杜為杜陵屬京兆尹後漢及晉因之後魏改曰杜城

後周廢之故城在今縣南漢霸陵縣本秦芷陽文帝葬其上改曰霸陵陵在霸水之西霸水故滋水也秦穆公更名以顯霸功晉曰霸城後魏曰西霸城後周廢之故城在今縣東南漢南陵縣故城在今縣東南有白鹿原長樂陂本澹坡隋文帝更名有灊水澹水

次畿鄠縣古有扈國有甘水出南山甘谷北入渭秦孝文王起葑陽宮於此二漢屬右扶風晉屬始平郡隋屬京兆郡唐因之

次畿藍田縣漢屬京兆尹後漢晉皆因之後周置藍田郡尋廢隋屬京兆郡唐因之南有藍田關故嶢關也漢高帝自武關攻秦用張良計破秦於此

次畿咸陽縣秦孝公十二年作咸陽築冀闕自櫟陽徙都之其後始皇以為咸陽人多先王之宮庭小吾聞豐鎬之間帝王



之都也乃營作朝宮渭南上林苑中先作前殿阿房東西五百步南北五十丈為複道自阿房渡渭屬之咸陽以象天極閣道絕漢抵營室云後項籍屠咸陽燒其宮室漢高帝元年更名新城七年罷屬長安武帝元鼎三年別為渭城縣屬右扶風後漢省之唐武德元年析涇陽始平置咸陽縣屬京兆府秦咸陽故城在縣東十五里漢渭城故城在今縣東北故杜郵也秦白起遷陰密出咸陽西門十里至杜郵賜死即此地漢長陵縣高帝所葬屬左馮翊後漢屬京兆尹晉省之故城在今縣境

次畿醴泉縣漢谷口縣屬左馮翊故城在今縣北鄭子真其縣人也後漢省之後魏置寧夷縣西魏置寧夷郡後周改為秦郡後廢隋開皇十八年改縣曰醴泉屬京兆郡唐因之有九峻山

次畿涇陽縣本秦故縣昭王封其弟涇陽君於此二漢及晉為池陽縣地後置涇陽縣及咸陽郡隋開皇初郡廢屬京兆郡唐因之有焦護澤謂之瓠中

次畿櫟陽縣秦獻公自雍徙居櫟陽而天雨金周太史儋見獻公曰周故與秦國合而別別五百歲復合七十歲而霸王出焉項羽立司馬欣為塞王都此漢高帝初取亦嘗居之太上皇葬櫟陽起萬年陵因分置萬年縣後漢省櫟陽入萬年晉屬京兆郡後周徙萬年置於長安城中而移廣陽縣置於故萬年城隋開皇三年改萬年為大興而復改廣陽為萬年屬京兆郡唐武德元年復改大興為萬年而改萬年為櫟陽屬京兆府

次畿高陵縣本秦故縣昭王封弟高陵君於此二漢屬左馮翊魏文帝改曰高陸晉屬京兆郡隋大業初復改曰高陵屬京



北郡唐屬京兆府

次畿興平縣本周大丘懿王都之秦改曰廢丘項羽立章邯為  
雍王都此漢高帝三年更名槐里屬右扶風晉置始平郡後  
置扶風郡而改槐里曰始平縣隋開皇初郡廢屬京兆郡唐  
屬京兆府景龍四年中宗送金城公主入蕃別於此因改曰  
金城縣至德二年改曰興平

次畿臨潼縣驪山在南故驪戎國周幽王遇犬戎之禍於此秦  
曰驪邑漢高帝七年太上皇思東歸高帝於是改築城寺街  
里以象豐徙豐民以實之命曰新豐屬京兆尹後漢及晉皆  
因之唐屬京兆府垂拱二年改曰慶山神龍元年復故名三  
年析新豐萬年置會昌縣七年省新豐入焉改曰昭應屬京  
兆府 皇朝大中祥符八年改曰臨潼唐置宮在驪山下  
咸亨二年始名溫泉宮天寶元年更名驪山曰會昌山六年

更名溫泉曰華清宮宮治湯井為池環山列宮室又築羅城  
置百司及十宅焉有鴻門漢高帝會項羽於此有戲水陳涉  
遣將周章西入關至戲是也

次畿武功縣本郿邑后稷所封郿亦作櫟漢屬右扶風後漢省  
入郿武功亦漢縣本在渭南屬右扶風後漢因之晉屬始平  
郡後周置武功郡建德中郡廢而置武功於故櫟城今縣是  
也隋屬京兆郡唐屬京兆府漢美陽縣屬右扶風後漢及晉  
皆因之後周省入武功故城在今縣北七里有太乙山禹貢  
所謂終南有垂山禹貢所謂敦物也

次畿乾祐縣本安業縣唐萬歲通天元年析商州之豐陽置景  
龍三年屬雍州景雲元年屬商州乾元元年改為乾元縣漢  
改曰乾祐屬京兆府

次畿奉天縣唐文明元年析醴泉始平好時武功永壽置以奉



乾陵陵在北五里屬京兆府德宗避涇卒之亂出居於此為  
朱泚所圍賴渾瑊扞城得以不陷乾寧二年以縣置乾州  
皇朝熙寧五年州廢復來屬

次畿終南縣本漢盩厔縣地唐武德二年析置終南縣正觀八  
年省後為清平鎮 皇朝大觀二年復置

次府河中府周時為魏國春秋時屬晉以封大夫畢萬戰國時  
魏惠王徙都大梁而其地入秦後置河東郡二漢晉皆因之兼  
置雍州後魏改為秦州後周改為蒲州隋初郡廢煬帝初州廢  
復置河東郡唐初為蒲州開元八年置中都為府是年罷都為  
州乾元三年復為河中府尋罷後為河中節度 皇朝太平  
興國七年改為護國軍今縣八

次赤河東縣故蒲坂舜之所都有歷山媯汭水春秋文十二年  
晉人秦人戰于河曲在縣南戰國屬魏秦昭襄王四年取蒲

坂後屬河東郡二漢及晉因之後魏後周皆為郡焉隋開皇  
初郡廢十六年析置河東縣大業初復置郡省蒲坂入焉唐  
初為蒲州後為河中府

次畿臨晉縣本桑泉左傳僖二十四年晉公子重耳濟河入桑  
泉是也漢為解縣地隋開皇十六年析猗氏置桑泉縣屬河  
東郡唐屬河中府天寶十三年改為臨晉解本春秋時解梁  
二漢及晉屬河東郡後徙焉故城在今縣東南

次畿猗氏縣本令狐左傳僖二十四年晉公子重耳濟河圍令  
狐是也縣南對澤即猗頓之故居頓魯之窮士聞朱公富往  
問術焉朱公曰子欲速富當畜五牝於是乃適西河大畜牛  
羊十年之間其畜不可計貲擬王公故遂以猗氏名縣漢屬  
河東郡後漢晉皆因之西魏改曰梁泉後周復故隋屬河東  
郡唐屬河中府有郇城周文王子所封詩所謂郇伯勞之者



也

次畿虞鄉縣本漢解縣地元魏分置虞鄉縣隋因之唐武德元年改虞鄉為解縣而於解西五十里別置虞鄉縣屬蒲州後屬河中府

次畿萬泉縣唐武德三年析稷山安邑猗氏汾陽龍門置屬絳州大順二年來屬

次畿龍門縣古耿國商祖乙自相徙居之春秋時晉獻公滅耿以賜大夫趙夙戰國時屬魏為皮氏縣秦惠王渡河取皮氏二漢屬河東郡魏晉屬平陽郡後魏改為龍門兼置郡隋開皇初郡廢屬河東郡唐武德二年秦州徙治此正觀十七年州廢屬絳州元和初來屬有龍門山禹貢所謂導河積石至于龍門是也

次畿榮河縣本魏之汾陰縣秦惠王渡河取汾陰即此漢屬河

東郡武帝立后土祠於汾陰睢上親望拜如上帝禮後漢亦屬河東郡晉省之後魏復置兼置汾陰郡隋開皇初郡廢屬河東郡唐武德元年改曰秦州正觀十七年州廢來屬開元十年明皇祀后土獲寶鼎因改為寶鼎縣 皇朝大中祥符四年改寶鼎縣曰榮河置慶成軍熙寧元年廢軍以榮河來屬

永樂縣古魏國詩序所謂魏地狹隘者也春秋時晉獻公滅魏以賜大夫畢萬漢為河北縣屬河東郡魏晉皆因之後縣東徙焉唐武德元年分芮城置永樂縣以永樂澗為名屬芮州州廢屬鼎州正觀八年來屬後又屬虢州神龍元年復來屬禹貢雷首山在北山南曰首陽伯夷叔齊隱居其下

大都督府陝州昔周召分陝之所春秋虢國之地所謂北虢也戰國屬韓秦屬三川郡二漢及晉皆屬弘農郡後魏置弘農郡



兼置陝州隋開皇初郡廢大業初州廢屬河南郡義寧元年置  
弘農郡唐武德元年曰陝州天寶元年更曰陝郡天祐元年昭  
宗居陝升為興唐府哀帝初復故號曰保義軍 皇朝太平  
興國元年改保平軍今縣七

上陝縣古號國所謂上陽也故城在今縣東漢屬弘農郡後漢  
及晉皆因之後魏置陝州及弘農郡後周因之隋屬河南郡  
唐復為陝州有焦國周武王封炎帝之後於此有莘原魯莊  
公三十二年有神降于莘卽此石壕鎮本嶠縣後魏置唐武  
德八年來屬正觀十四年改為硤石縣姚崇其邑人也 皇  
朝熙寧六年省為鎮有禹貢底柱山山有三門河所經唐太  
宗勒銘於此

上平陸縣本虞虢之地吳山在西上有虞城舜始封於此至周  
武王時封太王子仲雍之後是為虞公春秋時晉所滅虢下

陽邑在東北漢為太陽縣屬河東郡後漢及晉皆因之後廢  
焉而置河北縣及河北郡隋開皇初郡廢屬蒲州唐正觀元  
年來屬天寶元年太守李齊物開三門以利運漕得古刃有  
篆文曰平陸因更名有傅巖在北卽傳說築處有茅津在西  
南對陝城魯文公時秦伯伐晉晉人不出遂自茅津濟卽此  
上夏縣本夏禹之都漢為安邑縣地後置夏縣及安邑郡隋開  
皇初郡廢屬虞州唐正觀十七年屬絳州乾元三年來屬有  
巫咸山蓋神巫所遊故山得其名  
上靈寶縣古函谷關秦人恃之以為險固漢武帝徙關於新安  
而以故關置弘農郡及弘農縣東漢晉因之元魏置弘農郡  
隋開皇十六年置桃林縣屬洛州唐武德元年來屬天寶元  
年得天寶靈符於古函谷關因改元兼改縣靈寶關在縣西  
南十里老子西遊至關關令尹喜先見其氣知真人當過物



色而得之曰子將隱矣強爲我著書孟嘗君自秦逃歸夜半至關其客效鷄鳴遂得出關戰國時九國仰關而攻秦秦人開關延敵九國之師逡巡而不敢進曹陽亭在縣東十三里秦章邯敗陳涉將周文於此漢獻帝歸至此爲李催郭汜所逼遂露次焉曹公改爲好陽縣西南境卽古桃林之野東北有桑田亭春秋虢公敗戎于桑田卽此

中下芮城縣本魏國地魯桓公時芮伯萬爲母姜氏所逐自今馮翊縣界出居於魏卽此地也漢爲河北縣地後周改曰芮城置永樂郡郡後廢焉隋屬河東郡唐武德二年置芮州正觀元年州廢來屬

中下湖城縣本曰湖黃帝采首山之銅鑄鼎於荆山下鼎旣成有龍垂胡髯下迎黃帝後世因名其處曰鼎湖漢武帝改曰湖屬京兆尹戾太子敗亡至此自殺後漢屬弘農郡晉因之

後曰湖城隋改爲閩鄉縣唐屬號州 皇朝太平興國三年改爲閩鄉屬河南郡唐武德元年屬鼎州正觀八年屬號州 皇朝太平興國三年來屬漢戾園在今縣東南

中都督府延安府春秋白翟之地秦屬上郡漢初爲翟國尋復爲上郡後漢因之漢末羌胡大擾戶口流散郡縣皆廢焉後魏置東夏州西魏改曰延州置總管府隋置延安郡唐復爲延州梁號忠義軍後唐改曰彰武 皇朝升延安府今縣七

中膚施縣秦屬上郡二漢因之後廢焉隋大業三年置延安郡唐爲延州豐林鎮本漢臨河縣地元魏置廣武縣隋改曰豐林屬延安郡唐屬延州 皇朝熙寧五年省入膚施金明



寨本秦高奴縣項羽立董翳為狄王都高奴即此漢屬上郡  
東漢因之漢末廢焉元魏置廣樂縣隋改曰金明屬延安郡  
後廢焉唐武德二年析膚施復置以縣置北武州正觀二年  
州廢來屬 皇朝熙寧五年省入膚施

中延川縣漢臨河縣地屬朔方郡東漢省之西魏置縣曰文安  
及置郡隋開皇初郡廢改縣為延川屬延安郡唐屬延州延  
水鎮本安民縣唐武德二年析延川置 皇朝熙寧八年  
省入延川

中延長縣漢膚施縣地西魏置延安縣隋屬延安郡唐屬延州  
廣德二年改為延長

中門山縣後周置隋大業初省入汾川唐武德三年復置屬丹  
州廣德二年來屬

中臨真縣漢高奴縣地元魏置臨真縣西魏又置他水郡真川

縣後周郡廢隋大業初省真川入臨真屬延安郡唐屬延州  
中敷政縣本因城元魏置後周廢尋又置隋屬延安郡唐武德  
二年徙治金城鎮更名金城正觀八年屬延州天寶元年更  
名敷城

中下甘泉縣唐武德元年分洛交置伏陸屬鄜州天寶元年改  
為甘泉後屬延州

望同州周為芮伯韓侯國春秋時屬秦晉戰國時屬秦魏秦屬  
內史項羽分屬塞國漢高帝置河上郡景帝分為左內史武帝  
改為左馮翊東漢因之魏除左字但為馮翊郡晉及元魏皆因  
之兼置華州西魏改曰同州取禹貢所謂漆沮既從澧水攸同  
以名焉隋初郡廢大業州廢復置馮翊郡唐武德元年曰同州  
天寶元年曰馮翊郡梁曰忠武軍 皇朝太平興國七年升  
定國軍今縣六



緊馮翊縣本芮國漢為臨晉縣地屬左馮翊元魏置華陰縣西魏改曰武鄉里及郡隋開皇初郡廢大業初改縣曰馮翊置郡唐為同州有沙苑周文帝敗齊神武於此有洛水商原所謂商顏

緊澄城縣漢徵縣地屬左馮翊左傳所謂取北徵是也徵澄音相近東漢省之元魏置澄城縣及澄城郡隋開皇初郡廢屬馮翊郡唐屬同州

緊朝邑縣故荔戎國秦厲共公獲之更名臨晉以築高壘臨晉國故也漢屬左馮翊東漢因之晉為馮翊郡治焉元魏置南五泉縣西魏改曰朝邑隋屬馮翊郡唐屬同州臨晉縣故城在今縣西南

上郃陽縣古莘國其女太姒為周文王后詩所謂在郃之陽是也漢為郃陽縣屬左馮翊東漢晉隋皆因之唐屬同州夏陽

鎮故梁國秦取之更名夏陽二漢屬左馮翊後省焉今入郃陽

中白水縣二漢衙縣地屬左馮翊故城在今縣東北後省焉元魏置白水縣隋屬馮翊郡唐屬同州春秋文二年晉侯及秦師戰于彭衙即此亦漢栗邑縣地屬左馮翊東漢及晉皆因之後省焉

中韓城縣故韓國漢為夏陽縣地屬左馮翊隋開皇十八年置韓城縣屬馮翊郡唐屬同州有禹貢梁山詩韓奕篇奕奕梁山即此有韓原魯僖公時秦伯伐晉戰於此有龍門山即禹導河至於龍門也魚集其上即為龍

望華州本鄭國春秋時屬晉戰國屬秦魏秦屬內史漢屬京兆尹東漢屬京兆弘農郡晉因之元魏置華山郡及東雍州西魏改曰華州隋初郡廢大業初州廢屬京兆馮翊郡唐武德元年

也十三 陝西永興軍路上



改曰華州垂拱二年避武氏諱改曰太州神龍元年復故名天寶元年曰華陰郡乾寧四年升興德府梁爲感化軍後唐改爲鎮國軍 皇朝皇祐五年改鎮漳軍今縣五  
上鄭縣鄭桓公始封此至子武公東徙新鄭漢屬京兆尹後漢及晉皆因之元魏置華山郡及東雍州西魏改曰華州隋屬京兆郡唐屬華州郭子儀其邑人也有少華山  
望下邳縣秦武公伐邾戎取其人來置此縣以有上邳故曰下邳漢屬京兆尹東漢屬弘農郡晉屬馮翊郡後置延壽郡隋開皇初郡廢屬馮翊郡唐垂拱元年來屬漢蓮勺縣屬左馮翊東漢及晉皆因之隋大業初省入焉故城在今縣東北望蒲城縣西魏置隋屬馮翊郡唐屬同州開元四年更名奉先屬京兆府天祐三年復屬同州 皇朝開寶四年復爲蒲城天禧四年來屬有金粟山

緊華陰縣禹貢華陰之地戰國時曰陰晉屬魏秦得之惠文王五年更名寧秦漢高帝八年更名華陰屬京兆尹東漢及晉屬弘農郡元魏置華山郡隋屬京兆郡唐屬華州禹貢太華山在縣東水經注云河水南流潼激關山因謂之潼關漢末曹公西征與韓遂馬超相持於此  
上渭南縣漢新豐縣地蓋苻秦時置元魏置渭南郡後周郡廢隋屬京兆郡唐因之周顯德三年來屬

輿地廣記卷第十三



輿地廣記卷第十四

陝西永興軍路下

緊耀州春秋戰國屬秦秦屬內史項氏分屬塞國漢初屬河上  
 郡後屬左馮翊東漢及晉皆因之元魏置北雍州西魏改為宜  
 州及置北地郡尋改為通川郡隋開皇初郡廢大業初州廢屬  
 京兆郡義寧二年置宜君郡唐武德四年改曰宜州正觀十七  
 年州廢天授二年復置宜州大足元年又廢天祐三年岐王李  
 茂貞墨制置耀州仍升義勝軍節度梁末帝時茂貞養子溫韜  
 以州降梁梁改為崇州靜勝軍後唐同光元年為耀州以為順  
 義軍皇朝開寶五年為威義軍太平興國元年改威德軍  
 今縣七

上華原縣隋屬京兆郡唐因之垂拱二年改華原曰永安神龍  
 元年復故名唐末李茂貞據鳳翔僭行墨制建為耀州以溫



韜為節度使唐諸陵在其境內者悉發掘之郭崇韜以為劫陵賊有土門山

望富平縣本漢懷德地東漢省之元魏置富平縣及北地郡後

周改為中華郡尋廢隋屬京兆郡唐因之後屬耀州有荆山

望三原縣漢池陽縣地屬左馮翊東漢因之晉為扶風郡治後

省焉苻秦於鞏薛山北置三原護軍元魏罷護軍置三原縣

後周置建忠郡尋廢隋屬京兆郡唐因之後屬耀州

上雲陽縣漢屬左馮翊秦有林光宮漢曰甘泉宮武帝立泰時

以祠太一東漢因之晉省焉後復置元魏屬北地郡後周置

雲陽郡隋開皇初郡廢屬京兆郡唐因之後屬耀州

上同官縣本漢祊縣屬左馮翊東漢因之晉省焉苻秦於祊

祊城東北銅官川置銅官護軍元魏罷護軍置銅官縣屬北

地郡隋曰同官屬京兆郡唐因之梁開平三年屬同州後唐

同光初屬耀州

中美原縣本頻陽縣秦厲公置在頻水之陽漢屬左馮翊東漢

晉元魏皆因之景明元年析置土門縣隋大業初省入華原

唐咸亨二年析富平華原蒲城於故土門縣置美原縣屬京

兆郡天祐三年李茂貞置鼎州梁改為裕州屬順義軍節度

後不見其廢時唐同光三年割屬耀州

中涓化縣本雲陽縣之梨園鎮 皇朝涓化四年置縣屬耀

州

緊邠州古豳國春秋戰國皆屬秦秦屬內史漢屬右扶風安定

北地郡漢末置新平郡兼屬安定晉因之西魏置豳州後周及

隋皆因之煬帝初州廢屬安定北地郡義寧二年復置豳州唐

開元十三年以字類豳改作邠焉天寶三載以為新平郡後升

為靜難軍節度今縣四

也十四

陝西永興軍路下

二



望新平縣本二漢漆縣屬右扶風漢末置新平郡晉因之後改漆縣爲白土西魏置豳州隋開皇四年改縣爲新平大業初州廢義寧二年復置苻堅墓在此

望宜祿縣漢鶡觚縣地屬北地郡後魏置宜祿縣以宜祿川爲名後周省入鶡觚屬安定郡唐正觀二年析新平保定靈臺復置屬豳州

上三水縣漢三水掬邑二縣地三水屬安定郡東漢因之晉省焉後復置西魏置恒州尋廢隋屬北地郡義寧二年屬豳州漢之掬邑卽故豳國周之先公劉所居屬右扶風東漢因之鄧禹遣馮愔守掬邑二人爭權愔遂殺歆卽此晉省焉故城在今縣東北有萬壽湫唐大曆八年因風雷而成下永壽縣唐武德二年分新平置神龍元年屬雍州唐隆元年來屬

上邠州春秋屬白翟秦屬上郡漢爲上郡及左馮翊東漢屬上郡魏武帝省焉晉陷於戎狄元魏置東秦州後改爲北華州西魏改爲敷州隋爲邠城郡尋改爲上郡唐爲邠州天寶元年爲洛交郡後升保大軍節度今縣四

緊洛交縣本漢雕陰縣地屬上郡東漢因之魏晉廢焉隋開皇三年置洛交縣大業三年置上郡唐置邠州三川鎮本漢翟道縣屬左馮翊東漢省之苻秦於長原城置長城縣元魏改爲三川以華池水黑水洛水所會爲名隋屬上郡唐屬邠州皇朝熙寧七年省入洛交

上洛川縣本漢邠縣地元魏置洛川縣隋屬上郡唐屬邠州上邠城縣昔秦文公夢黃蛇自天下屬地其口止於邠衍史敦曰此上帝之祥君其祠之於是作邠時祭白帝焉漢屬左馮翊東漢省之元魏置敷城縣隋大業初改爲邠城屬上郡唐



屬坊州唐末置翟州梁改為禧州改郿城曰昭化後唐同光元年復改為郿城屬郿州

中下直羅縣本漢雕陰縣地唐武德三年分三川洛交於直羅城置縣以城枕羅川水其川平直故

中解州自唐以上地理與河中府同漢乾祐元年割河中之間喜安邑解三縣置解州 皇朝因之今縣三

中解縣春秋時謂之解梁晉惠公因秦返國許賂秦以河外列城五內及解梁城是也漢屬河東後漢及晉皆因之元魏分

置虞鄉縣後省解入焉唐武德元年改虞鄉曰解縣而於解西五十里別置虞鄉皆屬河中府漢乾祐元年置解州有鹽

池左傳成六年晉人謀去故絳諸大夫皆曰必居郇瑕氏之地沃饒而近鹽是也

望聞喜縣本曲沃晉文侯封其弟成師謂之曲沃栢叔秦改為

左邑屬河東郡漢武帝元鼎六年將幸緱氏至左邑桐鄉間

南越破以為聞喜縣東漢及晉皆因之元魏置正平郡隋屬絳郡唐屬絳州後屬河中府漢乾祐元年來屬

緊安邑縣夏禹所都春秋時魏絳自魏徙此武侯二年城安邑蓋增廣之耳秦昭王二十一年魏獻安邑以為河東郡二漢

及晉皆因之元魏曰北安邑屬河北郡隋開皇十六年置虞州大業初州廢屬河東郡唐屬河中府漢乾祐元年來屬有

鳴條陌湯與桀戰于鳴條即此有鹽池

中府慶州周之先不窋所居春秋時為義渠之戎秦滅之屬北地郡二漢因之魏晉以後荒廢西魏置朔州後周廢焉隋文帝

置慶州煬帝初置弘化郡唐為慶州天寶元年曰安化郡至德元載曰順化郡升定安軍節度後唐降之 皇朝乾德二年

復為安化郡今縣三



中安化縣本漢郁郅縣地屬北地郡東漢省之後置弘化縣隋  
開皇十六年置弘州大業初州廢屬弘化郡唐為慶州治焉  
天寶元年曰安化至德元載曰順化 皇朝乾德二年復  
曰安化有不窰城同川縣本三泉隋義寧二年析彭原郡之  
彭原置唐武德三年改名同川屬慶州 皇朝乾德二年  
省入安化

望合水縣本合川唐武德元年置是年又析置蟠交縣正觀元  
年省合川入弘化天寶元年更蟠交曰合水後廢焉  
皇朝熙寧四年復置華池鎮本西魏置蔚州後周廢隋仁壽  
初置華池縣屬弘化郡唐屬慶州 皇朝熙寧四年省入  
合水故樂蟠縣本漢略畔道屬北地郡後省焉隋義寧二年  
析合水置樂蟠縣略畔與樂蟠音相近故訛耳唐屬慶州  
皇朝熙寧四年省入合水

緊彭原縣本漢彭陽縣屬安定郡東漢因之元魏置西北地郡  
隋開皇初郡廢十八年改縣曰彭原屬北地郡唐武德元年  
置彭州正觀元年州廢屬寧州 皇朝熙寧三年來屬

雄虢州春秋時為虢之南境虢亡屬晉戰國時屬秦魏二國秦  
平天下為三川郡漢屬弘農郡東漢及晉皆因之元魏置西弘  
農郡後周廢之隋煬帝置弘農郡恭帝改為鳳林郡唐初置鼎  
州因鼎湖為名後為虢州今縣三

中虢略縣左傳晉惠公許賂秦伯以河外列城五東盡虢略是  
也漢為弘農縣地屬弘農郡東漢及晉皆因之隋大業中自  
湖城縣界與郡俱徙於弘農川即今治也唐武德元年置鼎  
州正觀八年廢自盧氏移虢州於此神龍初避孝敬皇帝諱  
改曰恒農開元十六年復故名 皇朝建隆元年避廟諱  
改曰常農至道三年又改曰虢略玉城鎮故玉城縣西魏廢



之唐屬號州

皇朝熙寧四年省入號略

中盧氏縣漢屬弘農郡東漢因之晉屬上洛郡元魏置洛安郡西魏改為義川郡隋開皇初郡廢置號州大業初州廢屬弘農郡義寧元年復置號郡唐武德元年改為號州正觀八年州徙治弘農有禹貢熊耳山洛水所出

中朱陽縣元魏時置兼置朱陽郡後周郡廢隋屬弘農郡唐屬號州

望商州商契始封於此春秋時屬晉戰國時屬秦為內史地漢屬弘農郡東漢屬京兆尹晉初為京兆南部後置上雒郡元魏因之西魏兼置洛州後周改為商州隋初郡廢大業初州廢復為上洛郡唐復為商州天寶元年曰上洛郡今縣五  
中上洛縣本晉地竹書紀年晉烈公三年楚人伐我南鄙至于上洛是也漢屬弘農郡東漢屬京兆郡晉泰始二年置上洛

郡隋開皇初郡廢大業初復置唐為商州商山在縣西南秦四皓所隱也州界有七盤十二繞其道隘險王莽命王級曰繞雷之固南當荆楚蓋謂此地也有熊耳山

中下商洛縣古商邑契之所封秦以封衛鞅號曰商君漢屬弘農郡東漢屬京兆尹晉屬上洛郡隋曰商洛亦屬焉唐屬商州縣東有少習左傳哀四年楚司馬使謂晉陰地之大夫曰晉楚有盟好惡同之不然將通於少習以聽命秦謂之武關漢高帝游酈攻武關以入秦

中下洛南縣漢上雒縣地元魏置拒陽縣及拒陽郡隋開皇初郡廢改縣為洛南屬上洛郡唐屬商州

中下豐陽縣後周置隋屬上洛郡唐屬商州舊治吉川城麟德元年移治豐陽川

中下上津縣漢長利縣地屬漢中郡宋置北上洛郡梁改為南



洛州西魏為上州隋大業初州廢屬上洛郡唐屬商州

望寧州夏公劉之邑春秋時為義渠戎國地築城郭以自守而

秦稍蠶食之戰國時戎王與秦昭王母宣太后亂有二子宣太

后詐而殺戎王於甘泉遂起兵滅義渠始皇初屬北地郡漢屬

北地上郡東漢屬北地安定郡晉國之後沒於戎狄元魏獻文

置華州孝文改曰班州後為豳州西魏改為寧州後周分置趙

興郡隋改寧州曰豳尋廢州而改趙興為北地郡唐復為寧州

天寶元年曰彭原郡今縣四

緊定安縣漢泥陽縣地屬北地郡後周置趙興郡隋開皇初郡

廢大業初置北地郡唐為寧州

緊定平縣漢泥陽縣地唐武德二年析定安置屬寧州唐末置

衍州周顯德五年州廢屬鄜州後來屬

上襄樂縣漢襄洛縣也屬上郡元魏改洛為樂置襄樂郡西魏

置燕州後周並廢隋屬北地郡唐屬寧州泥陽鎮本泥陽縣

二漢屬北地郡晉為郡治元魏復置後省焉

下真寧縣漢陽周縣屬上郡東漢省之後復置西魏置顯州後

周廢焉隋開皇中改陽周縣為羅川屬北地郡唐屬寧州天

寶元年獲玉真人像二十七因改羅川縣為真寧有橋山黃

帝所葬

上坊州自隋以前地理與鄜州同後周天和中元皇帝為敷州

刺史於此地為馬坊武德二年分鄜州置坊州因故馬坊為名

天寶元年曰中部郡今縣二

緊中部縣漢翟道縣地屬左馮翊後秦姚興置中部縣元魏因

之置中部郡隋避廟諱改曰內部開皇中郡廢屬上郡唐置

坊州有杏城姚萇置在今縣西

中宜君縣漢祜縣地屬左馮翊元魏置宜君縣後置宜君郡



隋開皇初郡廢屬京兆郡唐初屬宜州正觀二十年屬雍州

龍朔三年來屬有玉華宮在今縣北唐貞觀二十年置

上丹州春秋時為白翟戰國時屬秦秦屬上郡二漢因之晉亂

沒於戎狄西魏置汾州及義川郡後改州為丹州隋開皇初郡

廢大業初州廢屬延安郡義寧元年置丹陽郡唐為丹州天寶

元年曰咸寧郡今縣一

中宜川縣本義川西魏置義川郡後周改縣為丹陽隋開皇初

復為義川義寧元年置丹陽郡唐為丹州 皇朝太平興

國元年改縣曰宜川故咸寧縣本永寧西魏改為太平隋開

皇中改為咸寧屬延安郡唐屬丹州 皇朝太平興國三

年省焉汾川鎮本安平縣元魏置後周改曰汾州隋屬延安

郡唐屬延州 皇朝熙寧三年省入宜川雲巖鎮本雲巖

縣唐武德元年析義川置屬丹州 皇朝熙寧七年省入

宜川

下環州自元魏以上地理與靈州同後周置會州隋改曰環州

以大河環曲為名大業初州廢屬靈武郡唐武德二年復置會

州正觀六年更置環州九年州廢還屬靈州咸亨三年置安樂

州以居吐谷渾部落至德後沒吐蕃大中三年收復更名威州

後廢焉晉天福四年復置威州割靈州之方渠靈州之馬嶺木

波三鎮為屬而治方渠周廣順二年改曰環州顯德四年廢為

通遠軍 皇朝淳化五年復為環州今縣一

上通遠縣本方渠漢屬北地郡東漢省之隋開皇十九年置鳴

沙縣屬靈武郡唐置威州晉以方渠鎮復置威州周改為環

州後廢州為通遠軍而改方渠為通遠縣 皇朝天聖四

年復改為通遠馬嶺鎮本馬嶺縣西漢為北地郡治東漢徙

治富平而省馬嶺焉



下府銀州春秋為白翟戰國屬秦後屬上郡二漢屬西河郡魏  
晉荒廢元魏立開光郡後周立真鄉郡兼立銀州隋開皇初二  
郡皆廢大業初州廢入雕陰郡唐正觀二年平梁師都立銀州  
天寶元年曰銀川郡唐末陷為拓跋氏 皇朝崇寧四年收  
復舊領縣四

中儒林縣二漢囿陰縣地屬西河郡苻秦有驄馬城土俗呼驄  
馬為乞銀因號乞銀谷後周於是立銀州隋開皇三年置儒  
林縣大業初州廢屬雕陰郡唐復立銀州東北有無定河即  
囿水也囿與銀音同而漢志作囿陰顏師古注云囿本作  
縣在囿水之陰因以為名王莽改為方陰則是當時已誤為  
囿字今有銀州銀水即是舊名猶存但字變耳以此考之則  
九域圖所載乞銀之說未可據也

中下真鄉縣西魏置後周立真鄉郡隋開皇初郡廢後屬雕陰  
郡唐正觀二年來屬西北有茹盧水

中開光縣元魏立開光郡後周因之隋開皇三年郡廢屬雕陰  
郡後省唐正觀二年平梁師都復置隸綏州八年隸柘州十  
三年州廢來屬

中下撫寧縣西魏置隋屬雕陰郡唐初隸綏州正觀八年來屬  
同下州綏德軍春秋時為白翟戰國時屬秦秦屬上郡漢初屬  
翟國後屬上郡東漢因之西魏置安樂郡兼置綏州隋開皇初  
郡廢大業初廢綏州而置上郡尋改為雕陰郡唐復為綏州末  
年陷於西戎 皇朝熙寧二年收復廢為綏德城屬延州後  
升為軍唐治龍泉縣統縣五

中龍泉縣漢膚施縣地元魏置上縣西魏以為安寧郡隋為雕  
陰郡唐為綏州天寶元年改縣為龍泉漢上郡故城在縣西  
南



中下延福縣本延陵西魏置隋開皇中改曰延福屬雕陰郡唐

屬綏州

中下綏德縣西魏置隋屬雕陰郡後廢之唐武德二年復置屬

綏州

中下城平縣西魏置隋屬雕陰郡唐屬綏州

中下大斌縣唐武德七年置治魏平取稽胡懷化文武雜半以

為名正觀二年移治今所

同下州保安軍自五代以上地理與延州同 皇朝太平興

國二年以延州永安鎮置保安軍統寨二

德靖寨天禧四年置建子城天聖元年改為德靖寨

順寧寨慶曆四年置

輿地廣記卷第十四

輿地廣記卷第十五

陝西秦鳳路上

次府鳳翔府春秋以來為秦都始皇時屬內史漢初屬雍國後

分為中地郡九年復屬內史建元六年分為右內史太初元年

更名主爵都尉為右扶風東漢因之魏晉為扶風郡元魏為秦

平郡兼置岐州西魏改郡為岐陽隋開皇初郡廢大業初州廢

復置扶風郡唐復為岐州至德二載肅宗自順化幸扶風是年

克復兩京置鳳翔府號為西京後罷京名今縣十

次赤天興縣故雍縣秦德公既立卜居雍曰後子孫飲馬於河

遂都雍至孝公乃徙焉二漢屬右扶風有五時以祠上帝說

者以為四面積高曰雍宜為神明之隩故立羣祠云晉屬扶

風郡元魏置秦平郡及岐州隋為扶風郡唐為岐州至德二

年改雍曰鳳翔仍析置天興縣寶應元年省鳳翔入天興有



橐泉宮秦孝公起有祈年宮秦惠公起有鳳臺秦穆公時有  
簫史者善吹簫能致白鳳穆公女弄玉好之公爲作鳳臺以  
居之一旦乘鳳而去秦回中宮在縣西漢文帝十四年匈奴  
入蕭關回中宮候騎至雍卽此

次畿岐山縣漢雍縣地後周三龍縣隋開皇十六年改爲岐山  
屬扶風郡唐屬鳳翔府有禹貢岐山有五將山苻堅爲姚萇  
將吳忠所執於此

次畿扶風縣漢美陽縣地後周置燕州唐武德二年置漳川縣  
正觀八年更名扶風屬岐州岐陽鎮昔周太王去邠踰梁山  
邑於岐山之下卽此詩所謂居岐之陽也文王始亦治焉二  
漢爲美陽縣地屬右扶風晉因之唐正觀七年置岐州元和  
三年省入扶風

次畿盩厔縣漢武帝置屬右扶風山曲曰盩水曲曰厔因山水

之曲以爲名東漢省之元魏復焉後周置周南郡及恒州尋  
並廢隋屬京兆郡唐因之天寶元年改爲宜壽至德二載復  
故名天復元年來屬有駱谷關司竹園

次畿郿縣二漢屬右扶風晉因之元魏改爲平陽縣西魏復曰  
郿城後周廢入周城隋開皇十八年改周城爲渭濱大業二  
年又改渭濱曰郿屬扶風郡唐屬岐州有郿塢漢末董卓所  
築號曰萬歲塢斜水出縣西南衙嶺山北歷斜谷徑五丈原  
東又北流入渭蜀諸葛亮帥師攻魏軍五丈原與司馬宣王  
對壘卽此

次畿寶雞縣故陳倉昔秦文公遊獵於陳倉北阪獲若石云其  
色如肝寶而祠之故曰陳寶其神來常以夜光輝若流星從  
東南來集於祠城形若雄雞其聲若雷野雞夜雉說者曰此  
寶夫人祠也歲歲與萊君合萊神來時天爲之雷鳴雉爲雉



漢屬右扶風東漢及晉皆因之元魏改曰宛川西魏復曰陳倉後周置顯州尋州縣俱廢隋開皇十八年復置陳倉縣屬扶風郡唐屬岐州至德二載更名寶雞陳倉故城在今縣東魏爲重鎮明帝太和二年蜀諸葛亮圍魏將郝昭於此不克而退大散關在西南有渭水汧水

次畿號縣本周號叔之國謂之西號秦武公十一年滅小號是也漢屬右扶風東漢省之後復置元魏置武都郡西魏改縣曰洛邑後周置翔州州尋廢隋開皇初郡廢大業初復改縣曰號屬扶風郡唐屬鳳翔府平陽鎮秦寧公二年徙居平陽是也漢爲郿縣地磻溪水出南山茲谷北流注於渭卽呂氏春秋所謂太公釣茲泉者也其投竿跽餌兩膝遺跡猶存次畿麟遊縣隋義寧元年於仁壽宮置鳳棲郡及麟遊縣二年以仁壽宮中獲白麟更郡曰麟遊唐武德元年曰麟州正觀

元年州廢縣屬岐州改仁壽宮爲九成宮

次畿普潤縣二漢杜陽縣地隋大業初置屬扶風郡唐屬鳳翔府有杜水漆水岐水

次畿好時縣祭天之所曰時封禪書曰雍旁故有吳陽武時皆廢無祠蓋黃帝時常用事雖晚周亦郊焉後以爲縣漢屬右扶風東漢省之元魏復置爲扶風郡治隋大業三年省入上宜唐武德二年析醴泉置好時屬雍州正觀八年省上宜入岐陽二十一年省好時岐陽復置上宜更上宜曰好時乾寧二年屬乾州

皇朝熙寧五年來屬

下府秦州周孝王封非子於此春秋戰國屬秦秦平天下屬隴西郡漢武帝分置天水郡東漢建武中更名漢陽郡兼爲涼州刺史治焉魏爲重鎮晉屬天水略陽二郡兼置秦州元魏因之又置漢陽郡隋開皇初郡廢大業初復置天水郡唐爲秦州升

也十五

陝西秦鳳路上

三



雄武軍節度今縣四

上成紀縣包羲氏生於此漢屬天水郡東漢屬漢陽郡晉屬天水郡後廢焉後周復置隋屬天水郡唐屬秦州州本治上邽而成紀本治小抗川開元二十二年地震州自上邽徙治成紀之敬親川縣亦移入新城天寶元年州還治上邽寶應元年陷吐蕃大中三年復故地徙治成紀而上邽廢有禹貢朱圉山邽山渭水瓦亭山

上天水縣漢上邽縣地屬隴西郡唐時陷吐蕃後收復置天水縣屬秦州唐末廢之後唐長興三年復置以赤砂鎮為治所有龍馬泉

中隴城縣漢為隴縣屬天水郡東漢屬漢陽郡隋開皇六年改曰隴城屬秦州唐因之漢略陽道故城在今縣西北阿陽縣故城亦在縣西北有大隴山瓦亭山街泉亭秦谷秦非子始

封於此

中清水縣漢屬天水郡東漢省之晉復置屬略陽郡元魏因之後置清水郡隋開皇初郡廢屬秦州唐因之有小隴山清水伏羌城本冀戎地秦武公十年伐冀戎縣之漢屬天水郡王莽末隗囂自稱西伯據此東漢為漢陽郡治焉晉屬天水郡兼置秦州元魏改曰當亭縣後周改曰冀城隋屬天水郡唐屬秦州武德二年更名伏羌後陷吐蕃 皇朝建隆二年置伏羌寨熙寧二年以為城有黃瓜縣元魏置及置漢陽郡後廢

上涇州秦秋戰國屬秦秦屬北地郡漢武帝分置安定郡東漢晉因之元魏太武帝兼置涇州蓋以涇水為名隋為安定郡唐為涇州天寶元年曰安定郡後升彰義軍節度 皇朝太平興國元年改彰化軍今縣四



望保定縣本安定漢屬安定郡東漢省之後復置為郡治焉元魏為涇州隋為安定郡唐為涇州至德元載更名保定漢烏氏縣故城在今縣東

上靈臺縣本鶡觚漢屬北地郡東漢屬安定郡晉因之後置趙平郡後周郡廢隋屬安定郡唐屬涇州天寶元年更名靈臺亦商時密國之地周文王所伐者也秦為陰密縣白起被遷於此漢晉屬安定郡元魏屬平涼郡後省隋大業初以其地置靈臺縣二年省入鶡觚蓋取文王伐密而民始附之意故以靈臺名縣焉

上良原縣隋大業初置屬安定郡唐屬涇州長武縣唐為長城隸邠州宜祿 皇朝咸平四年置保定縣來屬五年省為寨大觀二年復置 上熙州春秋戰國皆為西羌秦置隴西郡二漢晉因之惠帝分

置狄道郡前涼張駿置武始郡元魏置臨洮郡隋開皇初廢武始郡屬蘭州唐因之天寶三載分置臨州後陷吐蕃號武勝軍皇朝熙寧五年收復置熙州臨洮郡升鎮洮軍節度今縣一中下狄道縣秦漢為隴西郡晉為狄道郡張駿置武始郡元魏

置臨洮郡及龍城縣唐置臨州 皇朝置熙州有白石山在東渭源堡漢首陽縣地屬隴西郡東漢及晉皆因之元魏改首陽曰渭源隋屬隴西郡唐上元二年復改曰首陽而於渭源故城別置渭源縣屬渭州儀鳳三年省首陽入渭源沒蕃後廢 皇朝熙寧五年置渭源堡屬熙州有禹貢鳥鼠同穴山渭水所出今謂之青雀山

上隴州春秋戰國屬秦秦屬內史二漢屬右扶風晉屬扶風郡西魏置隴東郡兼置東秦州後改為隴州隋開皇三年郡廢大業三年州廢屬扶風郡唐復為隴州天寶元年曰汧陽郡今縣



望汧源縣本汧縣漢屬右扶風後漢及晉皆因之西魏曰汧陰縣後改曰杜陽後周復曰汧陰隋改曰汧源屬扶風郡唐為隴州治焉有禹貢岍山汧水所出有龍山弦蒲藪  
 緊汧陽縣二漢隸糜縣地屬右扶風晉省之元魏置汧陽縣及汧陽郡後周郡廢隋屬扶風郡唐屬隴州有隸澤  
 中吳山縣漢汧縣地元魏孝文帝置長蛇縣隋開皇末省入南田唐武德元年復置屬隴州正觀元年更名吳山有吳岳故南田縣元魏置屬武都郡隋屬扶風郡唐元和三年省  
 中隴安縣 皇朝開寶元年析汧陽置有秦領山  
 中下成州秦以前為白馬氏漢屬武都郡東漢及晉皆為郡治焉後為楊茂搜所據楊氏數世皆封仇池公元魏置南秦州西魏改為成州隋開皇初郡廢大業初州廢置漢陽郡唐復為成

州天寶元年更名同谷郡今縣二

中同谷縣本漢下辨道屬武都郡東漢及晉皆為郡治焉元魏屬修武郡後為白石縣置廣業郡西魏改縣曰同谷後周兼置康州隋開皇初郡廢大業初州廢屬河池郡唐武德元年以縣置西康州正觀六年州廢屬成州州初治上祿本漢縣屬武都郡東漢因之晉省焉後置仇池縣曰上祿唐改郡曰成州寶應元年沒吐蕃後廢咸通十三年復置徙治同谷有仇池山其上方百頃四面壁立峭絕險固自然有樓櫓卻敵之狀高七里餘蟠道三十六回上有豐水泉煮土成鹽漢末為氏楊茂搜所據

中栗亭縣元魏蘭倉縣地置漢陽郡後唐清泰三年置栗亭縣屬成州有雷牛山栗亭川

下鳳州春秋時為氏羌所居秦屬隴西郡二漢屬武都郡晉因



之惠帝時沒於氏楊茂搜元魏置道郡兼置南岐州西魏改郡曰歸真後周郡廢改州曰鳳州隋大業初州廢置河池郡唐為鳳州天寶元年曰河池郡今縣三

上梁泉縣本故道秦文公時伐南山大梓化為牛入水秦為立怒特祠於故道即此漢王引兵從故道襲雍後屬武都郡東漢及晉因之元魏置固道郡及梁泉縣隋置河池郡唐為鳳州

緊河池縣漢屬武都郡東漢及晉皆因之後廢焉元魏置廣化縣及廣化郡隋開皇初郡廢仁壽初改縣曰河池屬河池郡唐屬鳳州 皇朝徙治固鎮

上兩當縣本漢故道縣地元魏置兩當縣及兩當郡隋開皇初郡廢屬河池郡唐屬鳳州 皇朝徙治廣鄉鎮廣鄉即水經所謂廣香川也有兩當水出陳倉縣之大散關西南流入

故道

下岷州秦屬隴西郡二漢及晉因之西魏置岷州及同和郡隋開皇初郡廢大業初州廢屬臨洮郡唐復為岷州天寶元年曰和政郡後陷吐蕃 皇朝熙寧六年收復今縣三 祐川縣本臨洮縣地二漢晉屬隴西郡西魏置溢樂縣及同和郡隋改溢樂為臨洮唐武德元年復為溢樂置岷州又置基城縣先天元年改基城為祐川沒蕃後並廢 皇朝崇寧四年復置祐川

中大潭縣漢冀縣地屬天水郡 皇朝建隆三年以良恭大潭二鎮置大潭縣屬秦州熙寧六年來屬有禹貢朱圉山

緊長道縣本漢上祿縣地屬武都郡元魏分置長道縣隋屬漢陽郡唐屬成州天寶末廢咸通十三年復置屬秦州 皇朝熙寧六年來屬有祁山蜀諸葛亮率諸軍攻祁山南安

也十五 陝西秦鳳路上 七



天水安定郡叛魏應亮卽此

輿地廣記卷第十五

輿地廣記卷第十六

陝西秦鳳路下

下府渭州秦屬北地郡二漢屬安定郡晉因之元魏屬太平郡  
 隋初屬原州後屬平涼郡唐屬原州寶應元年渭州沒吐蕃元  
 和四年以原州之平涼縣置行渭州廣明元年爲吐蕃所破中  
 和四年復置後曰隴西郡今縣五  
 中平涼縣漢朝那涇陽二縣地屬安定郡後周置平涼縣屬原  
 州隋屬平涼郡唐屬原州元和四年置行渭州今因之有笄  
 頭山禹貢涇水所出西有隴山有六盤關西北五里有吐蕃  
 會盟壇唐貞觀五年築  
 中潘原縣本陰槃二漢屬安定郡晉省之後復置元魏置平涼  
 郡隋開皇初郡廢屬安定郡唐屬涇州天寶元年改爲潘原  
 縣周顯德六年來屬



中安化縣故屬儀州

皇朝熙寧五年州廢來屬

中崇信縣

皇朝乾德元年以舊崇信軍地置崇信縣屬鳳

翔府淳化中屬儀州熙寧五年州廢來屬

中下華亭縣隋大業初置屬安定郡唐元和三年省入汧源後

復置兼置儀州

皇朝熙寧五年州廢來屬

望原州自唐以上地理與涇州同廣德元年原州沒吐蕃置行

原州於靈臺之百里城正元十九年徙治平涼元和三年又徙

治臨涇大中三年收復關隴歸治平高廣明後沒吐蕃又僑治

臨涇元屬涇州後唐清泰三年割屬原州後曰平涼郡今縣二

中臨涇縣漢屬安定郡東漢及晉為郡治焉元魏亦屬安定後

廢之隋大業初置湫谷縣尋改曰臨涇屬安定郡唐屬涇州

後為原州治所有漢朝那縣故城

中彭陽縣二漢屬安定郡晉省之後復置元魏置西北地郡隋

改縣為彭原唐武德二年析彭原置豐義縣屬寧州

皇朝太平興國元年改曰彭陽至道三年來屬

中下階州古為白馬氏國西戎之別種也漢武帝開之置武都

郡東漢晉因之後沒於氏楊茂搜元魏置武街郡西魏置武州

隋開皇初郡廢大業初州廢置武都郡唐武德元年置武州天

寶元年曰武都郡因沒吐蕃廢大祿二年復置為行州咸通中

始得故地龍紀初遣使招葺之景福元年更名階州今縣二

中下福津縣漢武都縣地元魏置翫當縣及武街郡西魏又於

今縣東北三十里萬郡故城置覆津縣後周省翫當入覆津

隋開皇初武階郡廢屬武州唐因之景福元年改覆津曰福

津後為州治故盤隄縣本西魏置南五部縣後改名隋屬武

都郡唐屬武州沒蕃後不復置

中下將利縣故白馬氏國漢為武都縣為郡治焉天池大澤在



其西東漢及晉皆因之元魏改武都縣曰石門西魏改曰安育置武州後周改安育曰將利仍置武都郡隋開皇初郡廢

大業初復置唐為武州治後徙福津

上河州古西羌地秦屬隴西郡漢屬金城隴西二郡東漢屬隴西郡漢末宋建自稱河首平漢王據此曹公遣夏侯淵討平之晉惠帝時置晉興郡前秦苻堅置河州西秦乞伏乾歸又據於此元魏亦置河州後周置枹罕郡隋開皇初郡廢大業初州廢復置枹罕郡唐武德二年平李軌置河州天寶元年曰安昌郡領縣三

中下枹罕縣本罕羌侯邑漢為枹罕縣屬金城郡東漢省之晉屬晉興郡苻秦置河州元魏因之後周置枹罕郡隋因之唐為河州

中下大夏縣漢屬隴西郡東漢因之晉屬晉興郡前涼張駿置

大夏郡隋屬枹罕郡唐屬河州正觀元年省入枹罕五年復置

中下鳳林縣本白石縣漢屬金城郡東漢屬隴西郡張駿改白石為永固屬晉興郡唐正觀七年於縣置烏州十一年州廢置安昌縣來屬天寶元年更名鳳林廣德元年州沒吐蕃皇朝熙寧六年收復置枹罕縣七年省之今日安鄉郡縣一

寧河縣本寧河寨 皇朝崇寧四年升為縣

下蘭州古西羌地秦屬隴西郡漢屬金城隴西二郡東漢魏晉因之前涼張寔分置廣武郡張駿又分置武始郡後為西秦乞伏國仁南涼禿髮烏孤所分據元魏後周屬武始郡隋開皇初郡廢置蘭州大業初州廢復置金城郡唐武德二年平薛舉置蘭州以阜蘭山為名天寶元年曰金城郡領縣二

下五泉縣本金城縣漢屬金城郡為并羌所據東漢及晉因之



有故苑川城西秦乞伏國仁據此後曰子城縣置金城郡隋開皇初郡廢置蘭州大業初州廢置金城郡復改縣曰金城後改曰五泉唐咸亨二年復曰金城天寶元年復曰五泉下金城縣本漢允吾縣為金城郡治所張駿置廣武郡南涼禿髮烏孤據此隋廢郡為廣武縣唐屬蘭州乾元二年更名金城漢浩亶允吾二縣故城在西南廣德元年州陷吐蕃皇朝元豐四年收復今縣一

蘭泉縣

鞏州古雍州地春秋時屬羌戎秦屬隴西郡二漢因之靈帝分立南安郡晉屬隴西南安二郡元魏為隴西南安安陽三郡兼置渭州後周併為南安郡隋開皇初郡廢大業初州廢復置隴西郡唐武德元年置渭州天寶元年曰隴西郡寶應元年沒吐蕃後廢皇朝皇祐四年以渭州地置古渭寨熙寧五年改

通遠軍崇寧三年改為鞏州今縣三

隴西縣本襄武縣地二漢屬隴西郡晉為郡治焉元魏置渭州

隋為隴西郡唐渭州沒吐蕃廢皇朝為通遠軍元祐五

年於郭下置隴西縣隋舊有隴西縣本獮道縣漢屬天水郡

在襄武之東靈帝置南安郡晉因之又置中陶縣後省獮道

入中陶隋開皇初南安郡廢改中陶為內陶又改為武陽十

年又改為隴西唐因之沒蕃後廢

永寧縣本永寧寨皇朝升為縣

寧遠縣本寧遠寨皇朝崇寧四年升為縣

會州古為西羌秦屬隴西郡漢屬金城安定二郡地後漢屬金

城武威二郡西魏置會州後周廢之隋屬平涼郡唐武德二年

平李軌置會州天寶元年曰會寧郡領縣二

上會寧縣本漢枝陽縣地屬金城郡晉張寔分屬廣武郡西魏



置會州後周廢之隋開皇十六年置會靈縣屬平涼郡唐置會州

上烏蘭縣本漢祖厲縣地屬安定郡東漢屬武威郡晉省之後周置烏蘭關唐武德九年置縣後州沒吐蕃 皇朝收復

今縣一

敷川縣

西安州秦漢屬北地郡唐屬靈州

皇朝置西安州

西寧州古西羌所居漢武帝西逐諸羌乃渡河湟築令居塞昭帝時屬金城郡東漢末置西平郡晉因之永嘉後禿髮烏孤初稱西平王其弟利鹿孤復都西平即此地也後魏置鄯州後周置樂都郡隋開皇初郡廢大業初州廢置西平郡唐武德二年平薛舉置鄯州天寶元年曰西平郡領縣三  
中湟水縣二漢破羌縣地屬金城郡建安中改為西平郡晉因

之元魏置鄯州後周置樂都郡隋開皇十八年改西都曰湟

水大業初為西平郡唐為鄯州破羌縣故城在縣西

中龍支縣漢允吾縣地東漢為龍耆縣元魏改曰北金城西魏

改曰龍支隋屬枹罕郡唐屬鄯州

中鄯城縣唐儀鳳三年置屬鄯州漢西平郡故城在西有土樓

山上元二年州沒於吐蕃

皇朝收復改為西寧州隴右

節度加號賓德軍

湟州古雍州地漢晉後屬西平郡唐屬鄯州

皇朝置湟州

有湟水東入河

廓州古西羌地東漢延嘉中護羌校尉段熲追燒河大豪至河首積石山出塞二千餘里即此地也漢末屬西平郡前涼置湟河郡元魏屬鄯州後周武帝逐吐谷渾置廓州及洮河郡隋開皇初州郡並廢大業初置澆河郡唐武德二年置廓州天寶元



年曰寧塞郡領縣三

下廣威縣本燒當羌地元魏置廣威縣隋仁壽初改爲化隆縣屬西平郡唐置廓州先天元年改化隆曰化成天寶元年曰廣威

下達化縣後周置達化郡并縣隋開皇初郡廢屬澆河郡有故澆河城晉時吐谷渾主阿豺所築在縣西一百二十里

下米川縣漢枹罕縣地屬金城郡唐正觀五年置米州及米川縣十年州廢屬河州永徽六年來屬廣德元年州沒吐蕃

皇朝收復

下洮州古爲諸羌之地後爲吐谷渾所據至後周武帝逐吐谷渾置洮陽郡兼置洮州隋開皇初郡廢大業初州廢置臨洮郡唐武德二年置洮州天寶元年曰臨洮郡領縣一中臨潭縣本吐谷渾地後周置美相縣唐正觀四年徙治洪和

城以故地置旭州五年又置臨潭縣八年州廢以臨潭屬洮州徙州來治復遷於洮陽城仍於舊洪和城置美相縣天寶中省美相併入有禹貢西傾山後名西強山吐谷渾主阿豺嘗升西強山觀墊江源問於羣僚曰此水東流更有何名由何郡國入何水也其長史曾和曰此水經仇池過晉壽出宕渠始號墊江至巴郡入江度廣陵會於海阿豺曰水尙知歸吾雖塞表小國而獨無所歸乎遣使通宋獻其方物宋少帝封爲澆河公西傾之北則洮水所出北流入河寶應元年州陷吐蕃

皇朝收復

同下州鎮戎軍秦屬北地郡東漢因之晉屬新平郡元魏太武帝置高平鎮後爲高平郡兼置原州隋初郡廢大業初州廢置平涼郡唐武德元年曰原州天寶元年曰平涼郡廣德元年沒吐蕃後廢

皇朝至道元年以故平高縣地置鎮戎軍



高平寨慶曆二年置本漢高平縣為安定郡治焉東漢屬安定郡光武自征隗囂河西太守竇融率五郡太守與車駕會高平是也晉省之元魏置高平鎮後改為平高縣置原州隋為平涼郡唐為原州

同下州德順軍自五代以前地理與渭州同 皇朝慶曆三年以渭州隴干城置德順軍今縣一

隴干縣 皇朝元祐八年置

同下州懷德軍本平夏城 皇朝大觀二年升為懷德軍以蕭關等寨隸之與西安鎮戎互為聲援應接蕭關為邊面之壯焉蓋唐之武州蕭關縣地也

同下州積石軍本漢之金城郡河關縣地唐置軍隸隴右節度府後沒吐蕃 皇朝復置有積石山禹導河自此始河水出崑崙自古言者皆失其實禹本紀山海經水經固以迂怪誕妄

而班固所載張騫窮河源事亦為臆說騫使大夏見蔥嶺于闐二河合流注蒲昌海其水亭居皆以為潛行地中南出於積石為中國河此乃意度之非實見蒲昌海與積石河通流也漢武帝以于闐山出玉按古圖書因名河所出曰崑崙至唐之時吐蕃為大國居積石西唐之聘使往來非一始見黃河在吐蕃中西南數千里向東北流與積石河相連而吐蕃又言崑崙在其國內長慶中劉元鼎為盟會使言河之上流由洪濟果西南行二千里水益狹冬春可涉夏秋乃勝舟其南三百里三山中高而四下曰紫山直大羊同國古所謂崑崙者也虜曰悶摩黎山東距長安五千里河源其閒流澄緩下稍合眾流色赤行益遠它水并注則濁河源東北直莫賀延磧尾隱測其地蓋劍南之西元鼎所經見大略如此







焉耆都督府本焉耆國

北庭大都護府在流沙之西北漢為烏孫故地東漢為車師後  
王庭歷代為胡虜所居唐正觀中討高昌于時突厥屯兵於可  
汗浮圖城與高昌相影響及高昌既平懼而來降乃以其地立  
庭州長安二年改曰北庭都護府建中二年曰大都護正元三  
年陷吐蕃領縣四

下金滿縣

下輪臺縣唐大祿六年置

下後庭縣本蒲類隸西州後來屬寶應元年更名其三縣並正  
觀十四年置

下西海縣寶應元年置

大都督府靈州古為戎狄地秦屬北地郡二漢魏晉皆因之元  
魏太武帝平赫連昌置薄骨律鎮河渚上舊是赫連果地至明

帝立靈州初治河北後徙治果園所築城後周立普樂郡隋開  
皇三年郡廢大業初州廢立靈武郡唐武德元年改曰靈州天  
寶元年曰靈武郡升為朔方軍節度領縣四

望回樂縣本二漢富平縣地屬北地郡晉及元魏因之後省焉

故城在縣西南元魏置回樂縣及立靈州後周立普樂郡西

魏立臨河郡隋開皇元年改臨河郡曰新昌三年州郡並廢

大業初立靈武郡唐武德元年曰靈州四年析置豐安縣正

觀四年於回樂境內立回州以豐安隸焉十三年州廢省豐

安天寶末明皇西狩太子即位於靈武是為肅宗

上靈武縣漢屬北地郡東漢省之後周置曰建安又立歷城郡

隋開皇三年郡廢屬靈州十八年改建安為廣潤仁壽元年

改今名唐因之

緊懷遠縣漢富平縣地後周置及立懷遠郡隋開皇三年郡廢



屬靈州唐立豐州武德六年廢省九原永豐二縣入懷遠  
上保靜縣本引靜隋開皇十一年置唐神龍元年曰安靜至德  
元載更名有賀蘭山

中都督夏州古為戎狄秦屬上郡後為匈奴所有漢武帝伐胡  
取河南地立朔方郡東漢因之後復沒於戎狄晉末赫連勃勃  
建都於此國號大夏子昌為元魏太武帝所滅以其地立夏州  
西魏立弘化郡隋開皇初郡廢大業初州廢立朔方郡唐正觀  
二年平梁師都改為夏州天寶元年曰朔方郡後升靜難軍節  
度領縣三

上朔方縣二漢屬朔方郡後廢晉末赫連勃勃於黑水之南築  
都號為統萬烝土以築城鐵錐刺入一寸即殺作人不及一  
寸行錐者死元魏立夏州及置巖綠縣西魏立弘化郡隋曰  
夏州復曰朔方郡後為梁師都所據唐克之改為夏州正觀

三年改巖綠為朔方縣唐末拓跋思恭為靜難軍節度使其  
後世擅立相承至今為梗

中下德靜縣隋末置唐正觀七年隸北開州八年曰化州十三  
年州廢來屬

中下寧朔縣後周置隸弘化郡隋屬朔方郡唐武德六年立南  
夏州正觀二年州廢縣省入朔方五年復置來屬長安二年  
省開元四年又置九年省其後又置

中都督涼州古為戎狄秦時屬匈奴使休屠王居其地漢武帝  
太初四年開立武威郡東漢魏晉因之兼立涼州前涼張軌後  
涼呂光皆據此北涼且渠蒙遜亦自張掖徙居焉元魏後周亦  
曰武威郡隋開皇初郡廢大業初州廢立武威郡唐武德二年  
平李軌立涼州天寶元年曰武威郡置為河西節度領縣五  
中下姑臧縣本匈奴蓋藏城後人語訛遂曰姑臧二漢魏晉皆

地十七

陝西路化外州

三



為武威郡治兼為涼州刺史治焉前涼後涼北涼皆據此元魏後周亦為武威郡隋唐為涼州或為武威郡漢鶉陰縣隸安定郡東漢來屬後省故城在今縣東南漢顯美縣屬張掖郡東漢來屬晉以後因之後周省入姑臧有禹貢豬野澤古休屠城蓋并得漢武威休屠二縣地

下神烏縣本漢鸞烏縣屬武威郡後省唐總章元年於漢縣故城復置神龍元年更名

中昌松縣本漢蒼松屬武威郡魏晉因之後涼呂光改為昌松元魏立昌松郡後周郡廢隋開皇初改縣為永世後復曰昌松唐因之漢允街縣神爵二年置屬金城郡東漢魏晉因之後省故城在今縣東南漢摺次縣屬武威郡東漢以後因之元魏屬昌松郡後周省入昌松

中下天寶縣本番和二漢屬張掖郡晉屬武威郡元魏立番和

郡後周郡廢為鎮隋開皇中為縣併障燕支二縣入焉唐咸亨元年立雄州調露元年州廢來屬天寶三載以山出醴泉更名有焉支山

中嘉麟縣本鸞烏二漢屬武威郡後省唐武德三年復置神烏縣正觀元年省神龍元年改武威縣為神烏而於鸞烏故城置嘉麟縣景龍元年省先天二年復置

中都督沙州昔舜竄三苗于三危卽此其後世為戎狄地出美瓜長者狐入其中食之首尾不出左傳所謂允姓之戎居干瓜州是也戰國及秦月氏有其地漢時入匈奴武帝開之屬酒泉郡後分立敦煌郡東漢魏晉因之西涼李暠初據此元魏亦曰敦煌郡兼立瓜州後周因之隋開皇初郡廢大業初州廢復為燉煌郡唐武德二年曰瓜州五年改為西沙州正觀七年曰沙州天寶元年曰燉煌郡自祿山之亂河右沒於吐蕃大中後吐



蕃微弱首領張義潮以瓜沙十一州來歸而宣懿德微不暇疆  
理名存有司而已後唐莊宗時升為歸義軍節度領縣二  
下燉煌縣二漢為郡治晉亦屬焉北魏立瓜州後周改縣為鳴  
沙隋大業初復為燉煌唐立沙州漢效穀縣屬敦煌郡晉因  
之元魏立效穀郡後周郡縣皆廢入焉禹貢三危山在東南  
有三峯有神沙山冬夏有聲如雷渥洼水漢元鼎中土人得  
奇馬以獻武帝欲異之乃云從渥洼水中出於是作天馬之  
歌  
下壽昌縣本龍勒二漢屬敦煌郡晉因之元魏立壽昌郡後周  
郡縣皆廢入敦煌唐武德二年析燉煌置壽昌永徽元年省  
乾封二年復置開元二十六年又省後復置治漢龍勒縣故  
城陽關在縣西六里玉門關在西北一百十八里二關之西  
三百餘里有蒲昌海一名鹽澤廣袤三四百里則蔥嶺于闐

兩河之所注也

下都督瓜州古西戎地戰國時月氏有之後入匈奴漢屬敦煌  
郡東漢魏晉皆因之元康五年立晉昌郡後廢元魏後周為常  
樂郡隋開皇初郡廢屬瓜州唐武德五年改瓜州為西沙州而  
析晉昌別立瓜州天寶元年曰晉昌郡領縣二  
中下晉昌縣本冥安二漢晉屬敦煌郡惠帝分屬晉昌郡西涼  
李暠改為涼興郡元魏改為常樂郡後周省冥安別置涼興  
郡隋開皇初郡廢屬瓜州改涼興為常樂縣唐武德四年更  
名晉昌五年別立瓜州於此  
中下常樂縣本廣至二漢屬敦煌郡魏分置宜禾縣晉立晉昌  
郡李暠改郡縣皆曰涼興元魏改郡曰常樂後周廢縣別置  
於冥安故城焉既而改常樂縣為晉昌唐武德元年別置常  
樂於此



下都督鹽州春秋戎狄之地秦屬北地郡二漢因之魏晉荒廢  
元魏立大興郡西魏改爲五原郡兼立西安州後改州曰鹽州  
又改郡爲大興郡隋開皇初郡廢大業初州廢立鹽川郡唐武  
德二年平梁師都立鹽州天寶元年曰五原郡正觀三年沒吐  
蕃九年復城之領縣二

上五原縣漢馬領縣地屬北地郡後置五原縣元魏立大興郡  
西魏立鹽州隋曰鹽川郡唐曰鹽州有烏池白池細項池四  
瓦窰池鹽

上白池縣本興寧隋末置景龍三年更名

中府勝州本春秋戎狄之地戰國屬趙秦屬雲中九原二郡二  
漢屬雲中五原二郡魏晉後荒廢隋開皇二十年立勝州大業  
初州廢立榆林郡唐武德中平梁師都立勝州天寶元年曰榆  
林郡領縣二

中下榆林縣本漢雲中之沙南五原之五原地南界有榆溪塞

卽蒙恬爲秦侵胡闢地數千里累石爲城植榆爲塞是也隋

開皇七年置榆林縣二十年立勝州大業初立榆林郡唐因

之漢五原縣故城在今縣西有隋故榆林宮東有榆林關

中下河濱縣亦漢沙南縣地唐正觀三年置以東臨河岸故名

及立雲州四年曰威州八年州廢來屬東北有河濱關

下都督西州漢爲車師前王國元帝置戊己校尉屯田車師故

地地形高敞因名高昌壘前涼張駿立高昌郡元魏和平元年

爲蠕蠕所并以闕伯周爲高昌王高昌稱王自此始孝文時金

城麴嘉稱王於此傳數世至唐正觀十四年討平之以其地立

西州開元中曰金山都督府天寶元年曰交河郡領縣五

下前庭縣本漢高昌壘壘有八城本中國人也張駿立高昌郡

呂光且渠蒙遜皆因之後闕伯周始建國至麴文泰爲唐所



滅立西州及置高昌縣寶應元年改為前庭取車師前王庭以名之

下柳中縣取漢舊地為名

中下交河縣漢車師前王國治交河城河水分流繞城下故號交河唐取以名縣

中蒲昌縣唐以始昌故城置本隸庭州後來屬東南有蒲類海胡人呼為婆悉海

下天山縣其五縣皆唐正觀十四年與州同置

下伊州在燉煌北大磧之外為戎狄之地非九州之限東漢明帝時伐匈奴始取伊吾盧地置宜禾都尉以屯田寶憲班超初築城於此班勇為西域長史乃居焉爾後多為屯田兵鎮之所未為郡縣元魏始立伊吾郡後又為鄯善所據唐正觀四年西域雜胡內附乃立西伊州六年曰伊州天寶元年曰伊吾郡領

縣三五代時曰胡盧磧為仲雲之族牙帳仲雲小月氏之遺種也

下伊吾縣本匈奴地曰伊吾盧在燉煌之北大磧之外南去玉門關八百里東去陽關二千七百三十里東漢以後為屯田兵鎮之所晉置伊吾縣屬敦煌郡元魏立伊吾郡後廢唐立伊州復置縣有天山胡人呼為折羅漫山每過之皆下馬拜一名雪山

下納職縣唐正觀四年以鄯善所築故城置開元六年省十五年復置

下柔遠縣唐正觀四年置取縣東柔遠故城以名之

下甘州春秋戰國為戎狄秦及漢初為匈奴所有使昆邪王居之武帝太初元年昆邪王來降以其地立張掖郡東漢魏晉皆因之北涼且渠蒙遜始都於此元魏置張掖郡西魏置西涼州



尋改曰甘州因州東甘峻山為名後周因之隋開皇初郡廢大業初州廢復為張掖郡唐武德二年平李軌立甘州天寶年曰張掖郡領縣二五代時為回鶻牙帳

上張掖縣晉舊縣本匈奴昆邪王地漢立張掖郡治驪得縣東漢因之晉改曰永平縣西魏立甘州隋廢郡大業初改永平為張掖縣唐因之漢昭武縣屬張掖郡晉改曰臨澤故城在縣西北漢張掖縣屬武威郡東漢因之後省故城亦在縣西北漢居延縣屬張掖郡尉治東漢興平二年立西海郡魏晉因之後廢故城在今縣東北故臨松郡前涼張天錫置元魏因之後廢為縣後周省入有遮虜障漢將軍路博德所築有祁連山臨松山甘峻山合黎山居延澤禹貢所謂導弱水至于合黎餘波入于流沙居延澤即古流沙也

中下刪丹縣漢屬張掖郡東漢因之後分屬西郡晉因之元魏

改縣曰山丹隋大業初復改曰刪丹屬張掖郡唐屬甘州漢日勒縣屬張掖郡東漢因之後分立西郡魏晉元魏因之改縣曰永寧西魏郡廢又改縣曰弱水後周省入山丹故城在縣東南有焉支山匈奴初失祁連焉支二山惜之歌曰奪我祁連山使我六畜不繁息失我焉支山使我婦女无顏色

下肅州古月氏地後入匈奴漢太初元年開立酒泉郡東漢魏晉因之西涼李暠自敦煌徙居於此元魏後周亦為酒泉郡隋開皇初郡廢仁壽中立肅州大業初州廢入張掖郡唐武德二年分立肅州天寶元年曰酒泉郡領縣三

中下酒泉縣本福祿漢立酒泉郡城下有金泉味如酒因以名焉東漢以後皆因之元魏置酒泉軍後復為郡隋郡廢立肅州州廢屬張掖郡義寧元年改福祿為酒泉唐立肅州西南有崑崙山周穆王見西王母於此漢平帝時金城塞外羌獻



魚鹽之地遂得西王母石室以為西海郡後為吐谷渾所都

隋大業五年討之復立西海郡

下福祿縣本漢樂涪縣屬酒泉郡東漢晉因之後省唐既改福

祿縣為酒泉武德二年於樂涪故城復置

中下玉門縣漢屬酒泉郡時罷玉門關屯徙其人於此因以名

縣東漢魏晉因之元魏立會稽郡併新鄉延興入會稽縣隋

開皇中改縣為玉門屬瓜州唐武德二年來屬正觀元年省

後置開元中沒吐蕃因置玉門軍天寶十四年廢軍為縣北

有獨登山出鹽以充貢有神雨山

下疊州歷代為諸羌所據晉屬汶山郡宋齊因之後為西魏後

周所有武帝立西疆恒香二郡兼立疊州隋開皇初二郡並廢

大業初州廢入臨洮同昌二郡唐武德二年復立疊州天寶元

年曰合川郡領縣二

下合川縣後周置及立西疆郡隋郡廢屬臨洮郡唐立疊州故

疊川縣後周置及立疊州隋廢州屬臨洮郡唐武德二年來

屬正觀二年省入焉有白嶺山

下常芬縣後周置及立恒香郡隋郡廢屬同昌郡唐武德元年

立芳州高宗上元二年陷吐蕃神龍元年州廢來屬有弱水

下宕州歷代為諸羌所據元魏武帝時始內附封為宕昌王後

周立宕昌國武帝天和元年置宕州隋大業初州廢為宕昌郡

唐武德元年復為宕州天寶元年曰懷道郡領縣二

下懷道縣後周置及立甘松郡隋開皇初郡廢屬宕州唐為州

治正觀三年省和戎縣入焉

下良恭縣本陽宕後周置及立宕昌郡兼立宕州隋郡廢後州

廢復為宕昌郡唐屬宕州正觀元年以成州之潭水來屬後

省入焉



下都督府豐州春秋為戎狄戰國屬趙秦屬九原郡漢屬五原郡東漢因之魏晉後為匈奴所沒隋文帝置豐州煬帝初州廢置五原郡唐正觀四年以突厥降戶立豐州不領縣十一年州廢入靈州二十三年復立天寶元年曰九原郡領縣二  
中下九原縣二漢屬五原郡後沒匈奴唐永徽四年復置  
中下永豐縣唐永徽元年置麟德元年別置豐安縣天寶末省  
東受降城唐景雲二年朔方軍總管張仁愿築三受降城  
中受降城有拂雲堆祠  
西受降城唐開元初為河所圯十年總管張說於城東別置新城北三百里有鷓鴣泉  
上宥州歷代地理與鹽州同唐調露元年於靈夏南境以降突厥立魯州麗州含州塞州依州契州以唐人為刺史謂之六胡州長安四年併為匡長二州神龍三年立蘭池都督府分六州

為縣開元十年復立魯麗契塞四州十年平康待賓遷其人於河南及江淮十八年復為匡長二州二十六年還所遷胡戶立宥州及延恩等縣天寶元年曰寧朔郡至德二載更郡曰懷德乾元元年復故名寶應後廢元和九年於經略軍復置距故州東北三百里十五年徙治長澤為吐蕃所破長慶四年節度使李祐復奏置領縣二  
中延恩縣唐開元二十六年以故匡州地置又以故塞門縣地置懷德縣以故蘭池州之長泉縣地置歸仁縣寶應後皆省元和九年復置延恩有經略軍在榆多勒城天寶中王忠嗣奏置  
中下長澤縣本漢三封縣地屬朔方郡後省元魏置長澤及立闡熙大安二郡又立長州隋開皇三年郡並廢大業三年州廢入朔方郡唐正觀七年立長州十三年州廢隸夏州元和







以來為太原郡治東漢以後兼為并州刺史治焉後魏爾朱榮高歡父子皆據此隋開皇十年於州城中古晉陽置太原縣唐高祖於此起義師以興王業 皇朝太平興國四年省入榆次晉陽縣本漢舊縣北齊置龍山縣隋開皇十年改曰晉陽 皇朝建隆四年以為平晉軍太平興國四年廢為平晉縣熙寧三年省入陽曲有龍山晉水所出

次畿太谷縣本漢陽邑縣屬太原郡東漢及晉皆因之隋開皇十八年更名唐因之有太谷山

次畿榆次縣本涂水晉大夫知徐吾之邑也秦莊襄王三年蒙驚攻趙榆次漢屬太原郡東漢晉因之北齊改曰中都隋開皇初復曰榆次唐因之

次畿壽陽縣晉泰始中置屬樂平郡後廢隋開皇十年復置屬并州後曰受陽唐武德六年受州徙治此正觀八年州廢來

屬十一年復曰壽陽有方山

次畿孟縣本晉大夫孟丙邑漢屬太原郡東漢晉因之後廢隋開皇十六年置原仇縣大業初復曰孟唐武德三年置受州

正觀八年州廢來屬

次畿交城縣隋開皇十六年分晉陽置屬并州唐先天二年析置靈川縣開元二年省

次畿文水縣本大陵縣地昔趙武靈王遊大陵夢處女鼓琴而歌即此漢屬太原郡東漢晉因之後曰受陽隋開皇十年改曰文水屬并州唐武德中屬汾州正觀初還屬并州天授元年以武后鄉里改為武興神龍元年復為文水

次畿祁縣本晉大夫祁奚邑晉滅祁氏以賈辛為大夫漢屬太原郡東漢晉因之北齊省隋開皇中復置屬并州唐因之

次畿清源縣本梗陽晉大夫魏戊邑漢為榆次縣地隋置清源



縣以清源水為名屬并州大業初省入晉陽唐武德元年復置

大都督府潞州春秋時為黎侯後赤狄奪其地而潞子嬰兒為晉所滅其地屬晉戰國時曰上黨為韓之別都遠韓近趙秦攻上黨韓不能救其守馮亭以地降趙秦攻取之置上黨郡二漢晉因之後魏亦為上黨郡後周置潞州隋置韓州大業初州廢復置上黨郡唐武德元年又為潞韓二州正觀十七年併韓入焉後領昭義軍節度 皇朝太平興國元年改昭德軍建中靖國元年改隆德軍今縣七

望上黨縣故黎侯國書所謂西伯戡黎詩所謂狄人迫逐黎侯是也漢為壺關縣屬上黨郡東漢晉因之後魏分置上黨縣為上黨郡治後周及唐為潞州治明皇嘗為州別駕有啓聖宮本明皇故第

上屯留縣春秋時本為純留屬晉左傳晉人執衛孫蒯于純留即此後趙肅侯奪晉君端氏而徙之屯留漢屬上黨郡東漢晉因之北齊廢焉隋開皇十六年復置屬潞州唐因之有漢余吾縣故城在縣西北三十里

上襄垣縣漢屬上黨郡東漢晉皆因之後魏置襄垣郡北齊郡廢後周置韓州隋大業初州廢屬上黨郡唐武德元年復置韓州正觀十七年州廢來屬有鹿臺山

上潞城縣故潞子國二漢潞縣屬上黨郡晉為郡治後縣廢隋開皇十六年復置潞城縣屬潞州唐因之有潞水為并州浸即濁漳水也

中黎城縣漢潞縣地後魏以潞縣被誅遺人置隋開皇十八年改名黎城有壺口故關

中壺關縣本漢壺關縣地後魏既以壺關置上黨縣乃移壺關



於此隋大業初省入上黨唐武德四年復析上黨置屬潞州  
中長子縣本周史辛甲之封邑左傳晉人執衛行人石買于長  
子卽此秦爲上黨郡治二漢因之晉屬上黨郡北齊廢焉隋  
開皇九年置曰寄氏縣十八年改曰長子屬潞州唐因之有  
廢鳩山漳水所出有羊腸坂王莽命左威將王嘉曰羊頭之  
阨北當燕趙蓋此地也

中下涉縣二漢屬魏郡晉屬廣平郡後魏廢焉隋開皇十八年  
復置屬潞州

望晉州堯時爲帝都所謂平陽也春秋屬晉戰國屬魏秦屬河  
東郡二漢因之魏分置平陽郡晉因之劉淵僭位設都於此後  
魏亦爲平陽郡兼置唐州後改曰晉州東魏北齊皆爲重鎮隋  
初郡廢煬帝初置臨汾郡唐武德元年曰晉州天寶元年曰平  
陽郡梁開平四年升定昌軍後唐同光元年改曰建雄軍

皇朝因之今縣十

望臨汾縣本平陽堯所都也戰國時韓武子居之二漢屬河東  
郡魏置平陽郡晉因之後魏置唐州改曰晉州隋開皇初改  
郡曰平河改縣曰臨汾尋郡廢大業初置臨汾郡唐置晉州  
有姑射山

緊洪洞縣本楊侯國姬姓也晉滅之爲楊邑二漢爲楊縣屬河  
東郡晉屬平陽郡隋屬臨汾郡義寧二年改曰洪洞取縣北  
洪洞嶺爲名唐屬晉州故洪洞城在今縣北東魏北齊鎮此  
緊襄陵縣二漢舊縣屬河東郡晉屬平陽郡後魏太武帝以擒  
赫連昌乃分置擒昌縣北齊廢襄陵入擒昌隋大業初又改  
擒昌爲襄陵屬臨汾郡唐屬晉州晉襄公之陵在西北因以  
名縣

上神山縣唐武德二年分襄陵置浮山縣東南有羊角山四年



以老子祠更名神山

趙城縣昔周穆王以趙城封造父即此漢為彘縣地屬河東郡  
隋義寧二年析霍邑置趙城縣屬晉州

上汾西縣後魏置曰臨汾縣及汾西郡隋開皇初郡廢十八年  
改縣曰汾西屬晉州唐因之

中霍邑縣本彘縣周厲王流於彘即此漢屬河東郡順帝陽嘉  
二年改曰永安晉省之後魏置永安郡隋開皇初郡廢十六

年置汾州十八年改為呂州而改永安為霍邑大業初州廢  
屬臨汾郡唐屬晉州霍太山在東北禹貢所謂太嶽也周封

文王子叔處為霍伯其後晉滅之有彘水西南流入汾  
中冀氏縣漢猗氏縣地屬上黨郡後魏置冀氏縣及冀氏郡北

齊郡廢隋屬臨汾郡唐屬晉州  
中下和川縣

中下岳陽縣漢穀遠縣地屬上黨郡後魏置安澤縣隋大業初

改曰岳陽屬臨汾郡唐屬晉州縣在太嶽之南禹貢所謂至  
于岳陽蓋指此而言也

中府州漢屬太原郡隋屬樓煩郡唐屬嵐州唐末置府州後唐

莊宗以雲中人折從阮為刺史晉出帝時從阮以兵攻契丹取  
其城堡十餘漢高祖天福十二年置永安軍以從阮為節度使

明年入朝拜從阮子德辰為本州團練使自此折氏世守府州  
皇朝因之今縣一

下府谷縣有安豐寧府百勝三寨濱河斥堠靖化西安三堡有  
黃河

下麟州漢屬五原西河二郡隋屬銀勝二州唐因之開元十二  
年節度使張說奏置麟州十四年州廢天寶元年王忠嗣復奏

置又為新秦郡 皇朝乾德五年升建寧軍節度端拱元年



改鎮西軍今縣三

上新秦縣唐天寶元年析連谷銀城置為麟州治按漢書食貨志武帝以山東被水災民多飢乏乃徙貧民於關以西及充朔方以南新秦中今之郡縣蓋其地也

中銀城縣本漢稠陽曼柏二縣地屬五原郡後魏置石城縣後

周改為銀城隋屬綏州後廢焉唐正觀二年復置四年屬銀

州八年屬勝州天寶元年來屬漢本紀光祿勳徐自為築五

原塞外列城西北至盧朐山即今縣北所謂光祿塞是也

下連谷縣本漢囿陰縣地屬西河郡唐正觀八年以隋連谷戍

置縣屬勝州天寶元年來屬

雄絳州春秋為晉都戰國屬魏秦時屬河東郡二漢因之晉屬

河東平陽二郡後魏置東雍州西魏後周以為重鎮後周改曰

絳州及平正絳二郡隋開皇初郡廢大業初州廢置絳郡唐武

德元年復曰絳州天寶元年曰絳郡

皇朝因之今縣七

望正平縣本二漢臨汾縣屬河東郡晉屬平陽郡後周置正平

郡隋開皇初置絳州十八年改臨汾縣為正平大業初置絳

郡唐為絳州有北齊武平關在縣西三十里故家雀關在縣

西七里並是鎮處有汾澮二水

望曲沃縣晉文侯封弟成師於此謂之曲沃桓叔二漢為絳縣

地後周置曲沃縣隋屬絳郡唐屬絳州有絳山絳水

望太平縣本漢臨汾縣地後魏置太平縣隋屬絳郡唐屬絳州

上翼城縣晉穆侯自晉陽徙都於絳至孫孝侯改絳為翼謂之

翼侯其後為曲沃武公所并自曲沃徙都之復謂之絳二漢

為絳縣地後魏為北絳縣及北絳郡隋開皇初郡廢十八年

改縣曰翼城屬絳州義寧元年置翼城郡唐武德元年曰澮

州四年州廢縣來屬

也十八

河東路上

六



中稷山縣本二漢聞喜縣地屬河東郡後魏置高涼縣又置龍門郡後周置勳州改曰絳州隋開皇初龍門郡廢徙絳州治正平十八年改高涼曰稷山唐因之有玉壁城後周王思政所築為重鎮齊神武再攻圍不克

中絳縣本晉之新田魏獻子曰新田土厚水深居之不疾蓋謂此二漢屬河東郡晉屬平陽後周置絳郡隋開皇初郡廢屬絳州唐因之

下垣曲縣本垣縣二漢晉屬河東郡後廢焉西魏置邵郡及白水縣後周置邵州改白水為亳城隋開皇初郡廢大業初州廢改亳城為垣縣屬絳郡義寧元年置邵原郡唐武德元年曰邵州正觀元年州廢縣來屬龍朔二年屬洛州長安二年復故正元三年屬陝州元和三年復故今日垣曲有禹貢王屋山沈水所出東流為濟

上代州春秋屬晉戰國屬趙趙武靈王置鴈門郡此其南境秦漢屬太原鴈門二郡東漢屬太原鴈門代三郡晉置鴈門郡後魏又置繁峙郡後周置肆州隋開皇五年改曰代州唐因之天寶元年曰鴈門郡 皇朝因之今縣四

中鴈門縣本漢廣武縣屬太原郡東漢屬代郡晉為鴈門郡治焉元魏後周皆因之隋初郡廢置代州唐因之有夏屋山史記趙襄子北登夏屋以銅斗擊殺代王即此有句注山漢擊匈奴於此一名西陘有滹沱水

中崞縣二漢晉皆屬鴈門郡後廢焉元魏置石城縣東魏置廓州北齊改為北顯州後周廢隋開皇十六年改縣曰平寇大業初又改曰崞縣屬鴈門郡唐屬代州有崞山故樓煩縣本樓煩胡地趙武靈王取之置縣二漢屬鴈門郡魏晉廢焉故城在今縣東故唐林縣本武延縣唐證聖元年析五臺崞置



唐隆元年改曰唐林

皇朝景德二年省入崞

中下五臺縣本慮虎縣二漢屬太原郡魏晉廢焉後魏置驢夷縣隋大業初改曰五臺屬鴈門郡唐屬代州有五臺山慮虎水

中下繁時縣二漢晉皆屬鴈門郡後廢焉元魏復置并置繁時

郡後周郡縣並廢隋開皇十八年復置縣屬代州唐因之

下隰州春秋屬晉戰國屬魏秦二漢屬河東郡魏晉屬平陽郡

後魏北齊為沁州後周置沁州及龍泉郡隋開皇初郡廢後復

置西汾州尋又改為隰州大業初復置龍泉郡唐武德元年改

為隰州天寶元年曰大寧郡今縣六

上隰川縣本晉之蒲邑晉獻公使公子重耳居蒲即此漢為蒲

子縣屬河東郡晉屬平陽郡後廢焉後周置長壽縣及龍泉

郡隋開皇初郡廢改長壽縣為隰川為隰州治唐因之

上溫泉縣本後周新城縣地隋開皇十年省縣入汾西唐武德

三年置溫泉及北溫州正觀元年州廢以縣來屬

中蒲縣後周置隋屬龍泉郡唐武德二年置昌州正觀元年州

廢以縣來屬

中大寧縣本漢北屈縣地屬河東郡隋為伍城縣地屬文城郡

唐武德二年更名是年置中州正觀元年州廢以縣來屬

中石樓縣本漢吐軍縣屬西河郡東漢省之後魏置吐京縣及

吐京郡蓋胡俗語訛也隋開皇初郡廢十八年改縣為石樓

屬隰州唐武德二年置西德州正觀元年州廢屬東和州州

廢來屬有石樓山

中永和縣本漢狐讞縣屬河東郡東漢晉因之後周置臨河縣

及臨河郡隋開皇初郡廢十八年改縣為永和屬隰州唐武

德二年置東和州六年析置樓山縣正觀二年州廢省樓山



以永和來屬

下慈州春秋屬晉戰國屬魏秦二漢屬河東郡魏晉屬平陽郡東魏置定陽郡及南汾州北齊改為西汾州隋開皇初郡廢十六年改州為耿州後復為汾州大業初州廢置文城郡唐武德元年復曰汾州五年曰南汾州八年曰慈州取慈烏戍為名天寶元年曰文城郡 皇朝熙寧五年州廢屬隰州元祐元年復置今縣一

中吉鄉縣本晉之北屈晉獻公使公子夷吾居屈即此地產馬所謂屈產之乘東魏置定陽縣及定陽郡隋改定陽曰吉昌置文城郡唐曰慈州後唐改吉昌為吉鄉 皇朝因之州廢屬隰州州復置仍為州治有禹貢壺口山文城鎮本元魏伍城縣地後置文城縣隋屬文城郡唐屬慈州有孟門山黃門 皇朝熙寧五年省入吉鄉唐慈州又領昌寧作城

呂香三縣昌寧縣元魏置并內陽郡隋開皇初郡廢屬文城郡後唐改曰寧鄉 皇朝省之伍城縣元魏置曰刑軍縣後改曰伍城又置伍城郡隋開皇初郡廢屬文城郡周顯德三年省呂香縣隋義寧元年分伍城置平昌縣唐正觀六年改為呂香周顯德三年省

下忻州春秋屬晉戰國屬趙秦二漢屬太原郡元魏置肆州後周徙州於鴈門郡隋開皇初置新興郡尋廢十八年置忻州取忻口為名大業初州廢屬樓煩郡義寧元年復置新興郡唐武德元年復為忻州天寶元年曰定襄郡 皇朝因之今縣二縣秀容縣本漢汾陽縣地屬太原郡東漢省之元魏置肆州北齊置平寇縣隋開皇初置新興郡十年廢平寇縣而自今宜芳秀容故城移縣治此十八年置忻州唐因之有忻口寨繫舟山



上定襄縣本漢陽曲縣地唐武德四年析秀容置有石嶺關甚險固

輿地廣記卷第十八

輿地廣記卷第十九

河東路下

望汾州春秋屬晉戰國屬趙秦屬太原郡二漢屬太原西河二郡魏因之晉屬西河國元魏置西河郡兼置汾州北齊置南朔州後周改曰介州隋開皇初郡廢大業初州廢復置西河郡唐武德元年改曰浩州三年改曰汾州 皇朝因之今縣五望西河縣本漢隰城屬西河郡東漢省之晉復置屬西河國元魏為西河郡及汾州治隋唐皆因之肅宗上元元年改隰城曰西河漢京陵縣地屬太原郡即趙文子與叔向觀于九原之所漢茲氏縣屬太原郡魏黃初二年置西河國有西河恭王司馬子盛碑望平遙縣本漢平陶縣屬太原郡東漢晉因之元魏以諱改陶為遙隋屬西河郡唐屬汾州

地十九

河東路下



上介休縣二漢屬太原郡晉屬西河國元魏分置平昌縣後周  
置介休郡省介休縣入平昌隋開皇初郡廢十八年改平昌  
曰介休屬西河郡義寧元年復置介休郡唐武德元年改爲  
介州正觀元年州廢來屬有縣上山今謂之介山有介子推  
祠漢鄆縣屬太原郡東漢晉因之九澤在北是爲昭餘祁漢  
中都縣文帝爲代王都此屬太原郡東漢晉因之後皆入介  
休

上孝義縣本漢中陽縣屬西河郡東漢因之隋曰永安正觀元  
年更名孝義有隱泉山

中靈石縣本漢介休縣地隋開皇十年置屬汾州唐因之有賈  
胡堡唐高祖討宋金剛次於此地有高壁嶺雀鼠谷汾水關  
皆險固之處

上澤州春秋屬晉戰國屬韓後屬趙秦屬上黨郡二漢屬上黨

河東二郡魏晉因之元魏置達州及高都長平安平三郡北齊  
置長平高都二郡後周併二郡爲高平郡隋開皇初郡廢改州  
爲澤州大業初州廢置長平郡置澤州天寶元年曰高平郡  
皇朝因之統縣六

緊晉城縣本高都縣二漢晉屬上黨郡元魏置建州北齊置長  
平高都二郡後周併爲高平郡隋開皇初郡廢十八年改縣  
爲丹川大業初置長平郡唐武德元年置建州三年析丹川  
縣置晉城六年州廢隸蓋州徙蓋州來治九年省丹川入晉  
城正觀元年州廢隸澤州徙澤州來治有天井關在縣南太  
行山上

上高平縣本泫氏縣地二漢晉屬上黨郡後析置平高縣北齊  
改曰高平省泫氏入焉隋屬長平郡唐武德元年置蓋州正  
觀元年州廢屬澤州秦將白起坑趙降卒四十萬人於長平



卽此地今有頭顱山

上陽城縣本漢澤縣二漢屬河東郡晉屬平陽郡隋置澤州取  
漢澤為名後屬長平郡唐武德元年復置澤州八年徙治端

氏天寶元年改縣為陽城有禹貢析城山王屋山漢澤水

中端氏縣韓趙魏既分晉徙晉君於端氏卽此二漢屬河東郡

晉屬平陽郡元魏置安平郡隋開皇初郡廢屬澤州唐武德

六年徙州來治此正觀元年徙治晉城

中陵川縣本漢沁氏縣北齊省之隋開皇十六年置陵川縣屬

澤州唐武德元年屬蓋州正觀元年來屬

中下沁水縣二漢晉皆屬河內郡元魏置廣寧郡北齊郡廢改

縣為永寧隋開皇十八年復為沁水屬澤州唐武德元年屬

蓋州正觀元年來屬

中憲州自唐以前地理與嵐州同本樓煩監牧以嵐州刺史兼  
領正元十五年別置監牧使龍紀元年節度使李克用表置靈

州及樓煩縣 皇朝因之咸平五年以樓煩屬嵐州以嵐州

之靜樂來屬熙寧三年州廢十年復置統縣一

中靜樂縣漢汾陽縣地屬太原郡後置岢嵐縣隋開皇十八年

改曰汾源大業四年又改為靜樂屬樓煩郡唐武德四年置

管州六年州廢以靜樂屬嵐州 皇朝咸平中來屬熙寧

三年屬嵐州十年復來屬有管涔山汾水所出有隋汾陽宮

故天池縣唐龍紀三年置屬憲州咸平中省入靜樂

下嵐州春秋屬晉後為胡地有樓煩王居焉其後屬趙秦屬太

原郡二漢晉因之後魏末置嵐州隋大業四年置樓煩郡唐武

德四年置東會州六年更名嵐州 皇朝因之統縣三

中宜芳縣本漢汾陽縣屬太原郡高帝封靳彊為侯國積粟所

在謂之羊腸倉有羊腸坂石磴縈回若羊腸焉隋末置嵐城

也十九

河東路下

三



縣屬樓煩郡唐武德四年更名宜芳六年為嵐州治有古秀容城魏土地記曰秀容胡人徙居之立秀容護軍治此

中下合河縣北齊置蔚汾縣隋大業四年改曰臨泉屬樓煩郡唐武德三年改曰臨津六年屬嵐州正觀元年又改為合河東有蔚汾關西有合河關

下樓煩縣唐龍紀元年於樓煩監西一里置為憲州治皇朝咸平中以縣來屬

下石州戰國時趙之離石邑後為秦魏二國之境秦屬太原郡地漢屬西河郡東漢為郡治焉晉置西河國北齊置西汾州及懷政郡後周改州為石州郡為離石郡隋開皇初郡廢大業初州廢復置離石郡唐武德元年復為石州天寶元年曰昌化郡皇朝因之統縣三

中離石縣本戰國趙邑秦昭王伐趙取離石是也後屬太原郡

漢屬西河郡而東漢徙郡治此晉為西河國治自漢末匈奴入居內郡魏武帝分其眾為五部在離石者以左賢王去卑監之去卑子豹豹子淵世據此地謂之左國城晉惠帝時淵起兵於此後趙石勒置永石郡後縣廢焉北齊置昌化縣及懷政郡後周郡縣並改曰離石隋因之唐為石州

中平夷縣後周析離石縣置隋屬離石郡唐屬石州

中方山縣後周置窟胡縣及窟胡郡隋開皇初郡廢後縣改為修化屬離石郡後周又置盧山縣大業初并入修化唐為方山縣武德二年置方州三年州廢來屬按舊史言方山隋縣隋史石州無方山有修化豈隋末更名而史官失紀歟有方山赤洪水

下遼州春秋屬晉戰國屬韓後屬趙秦二漢屬上黨郡晉為樂平郡後魏為遼陽郡隋屬遼州大業初州廢屬太原郡唐武德



三年復屬遼州六年州徙來治此八年曰箕州先天元年改曰儀州天寶元年曰樂平郡中和三年復曰遼州 皇朝因之

熙寧七年州廢屬平定軍元豐八年復置今縣四

下遼山縣本涅氏縣地二漢屬上黨郡晉置遼陽縣屬樂平郡

元魏曰遼陽北齊省之隋開皇十年復置更名遼山十六年

屬遼州大業初州廢屬太原郡唐武德三年復屬遼州六年

州治徙此有遼陽山古箕城春秋晉人敗狄于箕先軫死焉

卽此

中下榆社縣本涅氏縣地二漢屬上黨郡晉置武鄉縣唐武德

元年屬韓州三年以縣及并州之平城置榆州六年州廢來

屬

下平城縣

下和順縣本韓之闕與邑趙奢破秦軍於闕與卽此漢爲沾縣

屬上黨郡後置梁榆縣晉盧諶征艱賦云訪梁榆之虛郭乃

闕與之舊平是也隋開皇十年改曰和順屬太原縣唐武德

三年來屬熙寧七年省爲鎮入遼山元祐元年復置

下豐州自五代以前地理與府州同 皇朝嘉祐七年以府

州蘿泊川掌地置東南接府州西接麟州不統縣

同下州威勝軍自五代以前地理與潞州同 皇朝太平興

國二年置威勝軍併沁州入焉今縣四

中銅鞮縣本晉大夫羊舌赤之邑漢高帝破韓王信於此縣二

漢及晉屬上黨郡隋唐屬潞州 皇朝爲威勝軍有舊涅

縣後魏改爲陽城開皇十八年改爲甲川大業初省入銅鞮

上武鄉縣漢涅縣地晉置武鄉縣屬上黨郡石勒其縣人也有

漚麻池勒與李陽爭池相毆卽此及僭位置武鄉郡後魏去

武字隋開皇初郡廢屬潞州十六年分置榆社縣大業初省



入唐武后復加武字屬潞州

皇朝太平興國二年來屬

中下沁源縣本穀遠縣二漢屬上黨郡晉省之元魏置沁源縣

及義寧郡隋開皇初郡廢十六年置沁州大業初州廢屬上

黨郡唐武德元年復置沁州天寶元年曰陽城郡 皇朝

太平興國六年廢州以沁源來屬

中下縣上縣隋開皇十六年分介休縣之南境置屬汾州唐武

德元年屬沁州 皇朝太平興國六年屬大通監寶元二

年來屬晉文公以縣上為介之推田曰以志吾過且旌善人

即此

同下州平定軍春秋屬晉戰國屬趙秦及二漢屬太原上黨二

郡晉置樂平郡元魏為西陽郡後復為樂平隋開皇初郡廢十

六年置遼州大業初州廢屬太原縣唐武德三年復置遼州治

樂平領遼山平城石艾等縣後州徙治遼山而樂平石艾還屬

并州 皇朝太平興國二年置平定軍今縣二

中平定縣本上艾縣漢屬太原郡東漢屬常山國晉屬樂平郡

後改曰石艾隋屬太原郡唐武德三年屬遼州六年屬受州

八年州廢屬并州天寶元年改曰廣陽 皇朝太平興國

四年改曰平定置平定軍

中樂平縣本沾縣二漢屬上黨郡晉置樂平郡元魏北齊後周

皆因之隋開皇初廢郡為樂平縣屬太原郡唐武德三年以

縣置遼州六年徙治遼山而樂平屬并州 皇朝太平興

國四年來屬

同下州岢嵐軍自五代以前地理與嵐州同 皇朝太平興

國四年析置岢嵐軍今縣一

下嵐谷縣唐長安三年析宜芳縣置屬嵐州并以岢嵐柵為軍

景龍中張仁直徙其軍於朔方留者號岢嵐守捉隸大同軍

也十九

河東路下

六



皇朝復以縣置軍有崑嵐水崑嵐山

同下州寧化軍自五代以前地理與嵐州同 皇朝太平興

國四年析嵐州地置寧化縣五年於縣置軍領寧化一縣熙寧

三年縣廢後復置崇寧三年又廢有雪山汾水

同下州火山軍自五代以前地理與嵐州同 皇朝太平興

國七年以嵐州雄勇鎮置軍治平七年置火山縣四年縣廢有

火山黃河

同下州保德軍自五代以前地理與嵐州同 皇朝淳化四

年析嵐州地置定羌軍景德二年改曰保德不領縣有黃河

同下州晉寧軍自五代以前地理與石州同

中下臨泉縣後周置曰烏突及置烏突郡隋開皇初郡廢縣尋

改曰太和屬石州唐武德三年改縣曰臨泉置北和州正觀

三年州廢屬石州有湫水 皇朝置軍來屬

中定胡縣漢離石縣地後周置及置定胡郡隋開皇初郡廢屬  
石州有孟門關其地險固

河東路化外州

單于大都護府本戎狄地戰國屬趙秦漢屬雲中郡魏晉皆屬

新興郡隋屬榆林郡唐龍朔三年置雲中都護府麟德元年改

為單于大都護府升振武軍節度東北至朔州南至勝州領縣

一

中金河縣唐天寶四年置有金河有燕然山東漢竇憲勒銘於

此有李陵臺有王昭君墓名曰青冢唐咸通中李國昌為節

度使恣橫拒命而子克用盜據雲州侵掠代北為邊患焉

安北大都護府唐龍朔三年立曰瀚海都督府總章二年更名

開元二年治中受降城十年徙治豐勝二州之境十二年徙天

德軍領縣二



中陰山縣故北戎之地陰山東西千餘里草木茂盛多禽獸匈奴依阻其中治弓矢出來為寇是其苑囿也戰國屬趙趙武靈王築長城自代並陰山下至高闕為塞秦始皇斥逐匈奴自榆中並河以東屬之陰山以為三十四縣漢初復為匈奴所有武帝出師征伐斥奪此地置陰山縣屬西河郡匈奴失陰山過之未嘗不哭東漢省入西安陽屬五原郡唐天寶元年置陰山縣

上通濟縣

鎮北大都護府唐立領縣二

上大同縣

上長靈縣

下都督雲州本戎狄地戰國屬趙秦屬鴈門定襄代三郡二漢晉因之後魏道武帝徙都平城置司州代尹孝文帝遷都洛陽

改代尹曰萬年尹隋屬馬邑郡唐武德四年置北常州七年州廢正觀十四年置雲州天寶元年曰雲中郡升大同軍節度領縣一

上雲中縣本平城縣地漢晉屬鴈門郡後魏以為代都北齊置太平縣後周改曰雲中隋開皇初改曰雲內屬馬邑郡唐正觀十四年自朔州北定襄城移雲州於雲內之常安鎮置因改雲內為定襄縣永淳元年為默啜所破州縣俱廢開元二十年復置改定襄曰雲中有故陰館縣漢屬鴈門郡東漢為郡郡治後魏置平齊郡尋廢有故高柳城漢屬代郡東漢為郡治有參合陂漢屬代郡韓王信反與胡騎入居參合柴將軍屠參合斬信於此有故桐過城二漢屬定襄郡有故武進城漢屬定襄郡東漢屬雲中郡有故盛樂縣漢曰成樂屬定襄郡東漢屬雲中郡後魏昭成徙居盛樂宮即此有白登山匈奴

也十九 河東路化外州 凡



奴圍漢高帝於此有單于臺漢武帝出長城登單于臺勒兵十八萬騎旌旗徑千餘里威震匈奴即此

望應州唐末置後唐天成年升彰國軍節度領縣二

望金城縣後唐明宗其縣人也故置彰國軍而以金城為望縣

上混源縣

上新州唐末置後唐同光二年升威勝軍節度領縣四

中永興縣

礬石縣

龍門縣

懷安縣

下蔚州本代地在常山之北趙簡子與諸子約曰吾藏寶符於常山上先得者賞諸子馳之常山無所得毋卹還曰已得符矣從常山上臨代代可取也於是簡子以毋卹為賢其後繼立是

為襄子襄子北登夏屋請代王使蔚人以銅斗擊殺之遂發兵

定代地及武靈王置代郡秦及漢晉皆因之後魏置懷荒禦夷

二鎮及靈丘郡後周置蔚州隋開皇初郡廢大業初州廢屬鴈

門上谷二郡唐武德六年置蔚州天寶元年曰安邊郡至德二

載曰興唐郡統縣三

中下靈丘縣有趙武靈王墓因為名漢屬代郡東漢省之後

魏復置及置靈丘郡後周置蔚州隋屬鴈門郡唐初沒於突

厥武德六年置蔚州僑治陽曲七年僑治繁峙八年僑治秀

容故北常州城正觀五年破突厥復故地還治靈丘有澹水

發源於高氏山東入河漢志注以為靈丘之號在趙武靈王

之前此說非也齊地別有靈丘孟子謂蚺鼃辭靈丘而請士

師是也此靈丘在趙之北境非齊趙交兵之地

中興唐縣本安邊縣唐開元十二年置治橫野軍至德二載更



名興唐

下飛狐縣本廣昌縣漢屬代郡東漢省之晉復置隋仁壽初改曰飛狐屬上谷郡唐屬蔚州有飛狐谷飛狐關在代國南四十里漢酈食其說高帝所謂距飛狐之口是也晉劉琨為胡人所攻自代出飛狐口奔於安次即從此道

下朔州本戎狄地戰國屬趙秦漢屬代鴈門二郡靈帝末羌胡大擾定襄靈中五原朔方上郡之民並流徙分散建安二十年魏武帝始集塞下荒地置新興郡晉惠帝改曰晉昌郡後魏置懷朔鎮及朔州北齊置廣安郡隋開皇初郡廢大業初州廢置代郡尋改為馬邑郡唐武德四年復曰朔州統縣二  
中善陽縣本劇陽縣漢屬鴈門郡王莽改曰善陽東漢復曰劇陽晉省之北齊置招遠縣及廣安郡隋開皇初郡廢改縣曰善陽置代郡尋曰馬邑唐置朔州有故桑乾縣二漢屬代郡

後魏置桑乾郡北齊改為廣寧郡後周廢之有秦馬邑城晉太康地記云秦時建此城城輒崩不成有一馬周旋馳走反覆父老異之依以築城城乃不壞遂名馬邑漢武帝使聶壹翁佯為賣馬邑城以誘匈奴單于信之乃以十萬騎入武周塞覺漢兵謀引去即此地也二漢及晉屬鴈門郡故武州縣二漢屬鴈門郡所謂武周塞是也有紫河發源於此  
中馬邑縣唐開元五年析善陽置治大同軍城

下寰州唐末置領縣一

下寰清縣

下儒州唐末置領縣一

下縉山縣

下毅州本武州唐末置後唐長興元年改曰毅州領縣一


下文德縣



輿地廣記卷第十九

十九





|     |
|-----|
| ル 5 |
| 137 |
| 2   |